



ハ 5
777
1





廬山東林禪寺蓮宗善法祖堂勸修清淨業臣僧普

度謹自編集

蓮宗寶鑑一部發明佛祖念佛三昧已蒙諸尊

宿善知識題跋印證來詣大都禮拜

屬賓國公班的荅師父主盟佛法得奉

法旨教般若室利長老賢耶那室利濶羅羅司

丞於至大元年十月十一日至

隆福宮

今上皇帝潛龍時分月海法薛第一日親奉

蓮宗寶鑑啓奉

令旨教刊板印行者敬此即於大都明理不花丞相施到

無量壽法王寺內鏤板已遂畢工所集

洪因端為祝延

皇帝聖壽萬安

皇太后皇后齊年

太子諸王千秋文武官僚高增祿位

皇圖永固

佛日光輝 凡曰見聞同成佛道

皇慶壬子正月圓日優曇普度謹識

按經中說西方世界國名極樂其土有佛號阿彌陀巍巍蕩蕩超太古皇不令自申自然而化瓊池金地不染一塵樹林花鳥皆演苦空佛願力故攝彼羣情一念相應即登金臺雖下下品亦胎華蓮鴈門尊者結社勝流策勲淨業是以念佛之道昌行於世迨今千年謂之蓮宗也去古已遠法流成弊邪道混淆微旨曖昧由是優曇和尚棄宿願力痛嗟正宗奮真實心探尋要旨編次本末部分偽真定為十門名曰寶鑑賫赴大都咨扣

罽賓班的答灌頂國師證無叢勝契合佛經乃為

聞奏欽遇

皇上金輪皇帝聖通佛慧道合天心至照無私獎糴

曰善教刊板印行載上書乞復教

上可之頒降

聖旨遍行各省洗

佛日重光於

聖世起祖風載振於虎溪策精進而勿荒發闡提而必信悟覺花開於心地顯佛性存於本源咸知極樂之歸悉稟無爲之化明教上

仁宗正宗論息闢佛之議於當時優曇獻

皇上寶鑑編復白蓮之教於今日雖年代相遠蓋事實相符其名同芳而不萎其功並垂而不朽矣延祐甲寅住大仰山大圓佛鑑禪師傳法沙門

希陵 拜手

夫心性役乎塵勞煩惱而不爲塵勞煩惱之所汨沒如蓮生淤泥而不因淤泥染汚其質故直指之爲蓮也心性通乎三乘諸法而不爲三乘諸法所凌奪由宗分支派而不因支派忘失其本故念佛之爲宗也心性虛空含育萬有譬海中四珠出無盡藏故標之爲寶也心性明淨照了

色象喻一鑑當臺能辨妍醜故名之爲鑑也優
曇和尚浙之丹陽蔣氏家世事佛積善生而敏
銳弱冠則厭俗緣投簪薙髮初參龍華寶山慧
禪師一見器之誠其歷叩諸老之門琢磨淘汰
達心淨土見性彌陀深惜祖道湮微述集念佛
警要目之曰蓮宗寶鑑言言破惑井井有條天
童東巖圓應日禪師見而證之曰善哉善哉如
是如是繼之京都開法於法王禪寺道合灌頂
國師捧寶鑑而上奏

金輪興正宗而下頌

王旨忘軀爲法異世龜鑑開導人天續佛慧命實僧
中寶正本齊末統衆歸宗不捨悲願融真混俗示
火中蓮振復東林遠公祖師已墜之風于千古
之下所謂廬山蓮宗寶鑑者豈徒言哉宿師名
德

鉅公大人跋讚品題備于卷末後之修淨業者披
閱是集洞明佛祖旨趣弘揚斯道垂之無窮其
功詎可比量也耶延祐改元甲寅孟夏前發之
明智崇勝禪寺比丘大中德合再拜爲之叙云

廬山蓮宗寶鑑叙

夫眞法界性生佛平等而無異無同妙覺明心
染淨混融而非一非二然則塵塵淨土他方此
界皆為極樂之邦念念彌陀蠢動含靈盡是法
身之佛蓋為情生智隔想變體殊心隨生住異
滅之變遷境有坑坎堆阜之高下所以淨刹穢
方苦樂有異衆生諸佛凡聖不同是故六趣茫
茫匍匐九居之內四生浩浩升沈三界之中從
迷入迷由苦入苦動經塵劫無解脫期故我佛
開方便門教以念佛三昧指有淨土為歸向焉
所謂念佛三昧者梵語佛陀此云覺者自覺覺

他覺行圓滿故名曰佛如睡夢覺如蓮花開為
今有情返照回光淨念相繼久久純熟惑盡障
除一念不生前後除斷悟此覺性內無能念之
心外無所念之境能所兩忘生佛無二故曰念
佛梵語三昧此云正定謂思專想寂神智明妙
也經云若念佛者當知此人則是人中芬陀利
華東晉遠公祖師曰聽彌天法師講般若經豁
然大悟入於無量甚深三昧遊止廬山與高僧
朝士結緣修行故云諸教三昧其名甚衆功高
易進念佛為先因以白蓮名其社焉師乃著念

佛三昧叙蓋發揚此理也天台智者判教謂觀
無量壽經為大乘終實之教以三觀澄心者蓋
顯念佛之旨也法照尊者禮文殊而求指蓋指
此法也省常禪師結淨行緣宰相名卿皈嚮同
修者蓋修此道也長蘆贖禪師結蓮花勝會感
普賢普慧二菩薩入會蓋證明此道也慈照宗
主以本願力示現世間發廣度心引權就實隨
機化導蓋欲令利根鈍根俱悟此道也集白蓮
懺開四土圖以信行願為資糧以戒定慧為樞
要蓋立此念佛正宗也宋高宗御書蓮社二字

蓋崇此法門也欽惟

大元普天一統諸國來朝人心樂善廬山東林禪寺
東巖圓應曰禪師欽奉

聖旨住持道場修營梵宇集諸賢傳乃追古而整宗
綱架大法橋名宗遠而開祖道一十八載提唱
宗乘之外常以念佛三昧開導人天至元壬辰
秋赴慶元路育玉山廣利禪寺請而遜席于開
先悅堂閻禪師相繼住持元貞元年正月述明
居士燕覺道破衣和尚欽奉

聖旨賜白蓮宗善法堂護持教法元貞二年正月又

欽奉

聖旨賜通慧大師白蓮宗主仍賜金襴袈裟於大德
五年十月欽奉

聖朝頒降

御香金播到寺自晉至今僅乎千載感斯恩耀遐方
異域若賢若愚皆從化焉悉以齊心念佛仰祝
皇帝聖壽萬安天下太平法輪常轉熙熙然舜日堯
風卽此世界為極樂世界也普度濫叨釋裔無
補教門嘗見稱蓮宗者未諳念佛旨趣棄本逐
末著相修行淨業正因逮將沈沒皆是懷寶迷

邦背真向偽從其事者紛如牛毛具正見者尠
若麟角致令上慢之徒輕忽吾佛之道悲夫去
古時遙法久成弊正道湮微邪法增熾人多錯
解蹉入邪途不思淨土一門乃出輪迴之捷徑
其直如絃其朗如日奧旨在於經懺之間不遇
明師啓迪猶若群盲摸象各說異端從冥入冥
永纏邪見可痛惜哉矧今恭遇

佛心天子正法治世迺

君臣慶會之時政佛法流通之際得不以祖師念佛
三昧開示人天用作將來眼目俾同悟入佛知

見我余乃翹心淨土探賸先宗編集要言目曰
寶鑑照明真偽凡一十篇其首曰念佛法門漸偏
入室必由戶也次曰正教乃示念佛法門漸偏
頓圓使進修者隨根器而歸乎至道也又其次
曰正宗蓋示念佛三昧正心之理俾修習者明
其宗而達其本也又其次曰正派蓋明佛祖暨
諸宗師得道之本末欲令後學知其自也又
其次曰正信正行正願俾信正法修正行發正
誓而求生西方也次曰往生正訣蓋示臨終生
淨土之路也次曰正報蓋明修行所得淨土依

正之功德莊嚴也次曰正論蓋引諸佛誠言破
群邪異見欲令改不善而從善也非敢有助於
宗風為益於未聞者也欲其枉者直之邪者正
之疑者決之迷者悟之盡大地人於一念中同
得念佛三昧共證菩提不亦偉歟修淨業者無
悵慈悲試一展卷見聞隨喜讚輔流通其如佛
祖未出世一句子請高着眼皆大德九年乙巳
彌陀示相日江州廬山東林禪寺白蓮宗善法
堂主僧優曇普度齋沐謹題

廬山蓮宗寶鑑綱目

念佛寶鑑叙

念佛正因卷第一 念佛正教卷第二 念佛正

宗卷第三 念佛正派卷第四 念佛正信卷第

五 念佛正行卷第六 念佛正願卷第七 念

佛往生正訣卷第八 念佛正報卷第九 念佛

正論卷第十

目錄

第一卷 一十四章

念佛正因說 阿彌陀佛日地 彌陀釋迦本

願日地 佛為韋提希聖后說淨業正曰 孝

養父母 奉事師長 皈依三寶 發菩提心

受持戒法 慈心不殺 修十善業 深信曰

果 讀誦大乘 勸進行者

第二卷 一十九章

念佛正教說 佛為父王說念佛 善財參見

德雲比丘說念佛門 智首菩薩說念佛 龍

樹大士說念佛 念佛功德有七種勝 修持

法門 離相念佛三昧無住法門 天台念佛

三昧三觀法門 空觀念佛三昧無念法門

日觀念佛三昧專想法門 參禪念佛三昧究

竟法門 攝心念佛三昧調息法門 一相念
佛三昧專念法門 六時念佛功德回向法門
懺罪念佛功德繫念法門 晨昏念佛功德
信願法門 簡徑念佛功德十念法門 慈照
宗主圓融四土

第三卷 八章

念佛正宗說 定明宗體 念佛叅禪求宗旨
說 淨土非鈍根權說 真歇了禪師淨土宗
要 寂室大師示淨土實見 大智律師示念
佛事理不二 文法師淨行念佛宗要

第四卷 二十二章

念佛正派說 遠祖師事實 遠祖師歷朝謚
號 明教大師題遠祖師影堂記 廬山十八
大賢名氏 貫休禪師題十八賢影堂記 辯
明遠祖師成道事 壁谷曇鸞大師 天台智
者大師 京師善導和尚 金臺法照大師
睦州少康法師 省常大師 長蘆慈覺禪師
永明壽禪師 天竺慈雲懺主 文潞公傳
潞府宗坦疏主 慈照宗主 無爲子楊提刑
龍舒居士王虛中 儀真王侍郎

第五卷 六章

念佛正信說 斷疑生信 勸發信心 慈雲
式懺主往生正信偈 智者大師淨土十疑論
叙 楊提刑直指淨土決疑序

第六卷 一十四章

念佛正行說 修進工夫 資生助道 作福
助緣 去惡取善 拔濟幽趣 放諸生命
六度萬行齊修 維摩大士示淨土八法 較
明修行難易 天台示淨土忻厭二行門 淨
業道場 自行化他 以事檢心

第七卷 七章

念佛正願說 勸發大願 慈照宗主示念佛
人發願偈并序 求生淨土要在發願 善導
和尚修行發願儀 白侍郎發願求生淨土文
馮濟川施經發淨土願文

第八卷 一十二章

念佛往生正訣說 父母臨終往生淨土 臨
終三疑 臨終四關 臨終決疑撮要 僧濟
臨終注想西方 善導和尚臨終往生正念
文 化佛來迎 賢首菩薩臨終讚念佛偈

情想多少論報高下 命終善惡感報優劣
臨終十事不剋念佛勸預修

第九卷 五章

念佛正報說 功德莊嚴 淨土增修聖果
淨土三十益 淨土成佛

第十卷 二十五章

念佛正論說 西方彌陀說 真如本性說
辨真妄身心 辨明三寶 辨見聞覺知 破
妄說灾福 辨明空見 辨一合相 辨明雙
修 辨明三車 辨明三關 辨明大小二乘

辨明不生不滅 辨明曹溪路 辨佛法隱蔽

辨明超日月光 辨明髻中珠 辨明無漏果

辨明趙州茶 辨明教外別傳 辨關閉諸惡

趣門開示涅槃正路 辨明四生 破妄立十

號 誓願流通

名德題跋 十一章

明州天童長老東岩和尚跋語

廬山白蓮宗主悅堂和尚跋語

西峰及庵和尚信公長老跋語

大慶壽寺都總統西雲和尚跋語

饒州薦福長老月礪和尚跋語

姑蘇幻住禪庵中峰和尚跋語

荆岑普賢接待院不會禪師跋語

天峯祐禪師跋語 翰林承旨張疇齋題跋

廬山無住道人竺源跋 廬山優曇普度題

廬山蓮宗寶鑑目錄終

廬山蓮宗寶鑑念佛正目卷第一十四章

念佛正目說

蓋聞恒河沙數衆如來彌陀第一十方微塵諸佛刹極樂是歸至理本祇唯心初門必由因地故知合抱之木發於毫芒千里之行始於初步欲超生死以淨土為歸趣之方將證涅槃故念佛乃正心之要深信極樂真解脫之妙門諦想彌陀實衆生之慈父先明落處故望果以修因漸履玄途是後因而至果故知集群賢而結社有其旨焉專念佛以勸人興其教也因該果海果徹因源形直無不影端聲和自然響順

勢至示證圓通之要世尊說修淨業之因從聞思修
登三摩地憑信行願入法界門是以一念興而萬靈
知信心生而諸佛現纔稱寶號已投種於蓮胎一發
菩提卽標名於金地有緣斯遇自悟自修淺信不持
大愚大錯故云一乘極唱終歸獲至於樂邦萬行圓
修最勝獨稱於寶號八十億劫之重罪廓爾煙消十
萬億剎之遐方倏如羽化想念專注卽觀心而見佛
身心境交叅卽因門而成勝果十方淨穢卷舒同在
於毫端一性包融浩博該羅於法界是則諸佛與衆
生交徹淨土與穢土冥通彼此互收事理無礙若神

珠之頓含衆寶猶帝網之交映千光我心既然生
佛同爾是知遊神億剎實生乎自己心中孕質九蓮
豈逃於剎那際內二乘賢輩回心卽達於金池五逆
凡夫十念便登於寶界嗟乎識昏障重信寡疑多貶
淨業為權乘嗤誦持為麤行豈非耽溺火宅自甘永
劫之沉迷悖悞慈親深痛一生之虛喪復信非憑他
力截業惑以無由不遇此門脫生死而無路誓同諸
佛敢徇前修勸勉後賢深崇此道已發願今發願當
發願事事而回向彌陀若已生若今生若當生念念
而皆歸淨土欲取一生事辦便於這裏留心一劫時

中千車合轍四威儀內萬善同歸齊登極樂妙門速
成念佛三昧最初一步要分明直至西方無異路

阿彌陀佛因地

鼓音王經云過去劫中有國名妙喜王名憍尸迦祖
父清泰國王父月上轉輪王母殊勝妙顏生三子長
日月明次日憍尸迦三日帝衆時有一佛出世名曰
世自在王憍尸迦心發道意棄捨國位投佛出家號
曰法藏比丘又大彌陀經云法藏比丘於世自在王
佛所發無上意一切世間無能及者時佛說二百一
十億諸佛剎二應其心願法藏稽首禮佛廣說四十

八願

經云本
經具載

若不爾者誓不成佛是時大地震動天
雨妙華空中同聲讚言決定成佛

彌陀釋迦本願因地

悲華經云往昔劫中有轉輪王名無諍念大臣寶海
為善知識同於寶藏佛所發菩提心無諍念發願云
我修大乘取於淨土終不願於穢土成阿耨多羅三
藐三菩提世界衆生無諸苦惱我不得如是佛剎甯
乃不成正覺今既果滿號阿彌陀故現淨土寶海大
臣願於穢土成熟有情今已果滿號釋迦牟尼於此
濁惡世中成佛菩提

佛為韋提希聖后說淨業正因

觀無量壽佛經云爾時韋提希號泣向佛白言世尊
惟願為我廣說無憂惱處我當往生不樂閻浮濁惡
世也爾時世尊放眉間光徧照十方無量世界諸佛
國土皆於中現時韋提希見已白佛言是諸佛土雖
復清淨皆有光明我今樂生極樂世界阿彌陀佛所
惟願世尊教我思惟教我正受佛告韋提希阿彌陀
佛去此不遠汝當繫念諦觀彼國我今廣為汝說亦
令未來凡夫修淨業者得生西方極樂國土欲生彼
國者當修三福一者孝養父母奉事師長慈心不殺

修十善業二者受持三歸具足眾戒不犯威儀三者
發菩提心深信因果讀誦大乘勸進行者如此三事
名為淨業正因佛告阿難及韋提希諦聽諦聽善思
念之

孝養父母

念佛乃諸法之要孝養為百行之先孝心即是佛心
孝行無非佛行欲得道同諸佛先須孝養二親故贖
禪師云孝之一字眾妙之門佛語以孝為宗佛經以
孝為戒言中不昧口出戒光直下分明頓開心地夫
孝者有在家之孝有出家之孝在家孝者父母愛之

喜而不忘父母惡之勞而不怨承順顏色以盡養生
出家孝者割愛辭親食微契本深入無爲之理上酬
罔極之恩趣解脫之要途報慈親之捷徑非但未來
獲益亦於現世成功所以如來子夜踰城道圓雪嶺
盧能白金遺母法繼黃梅然而以法斷恩應思報德
是以迦維省父忉利寧親至於貧乏無依理合躬親
給侍是故畢陵迦起盡心之戒忍大師有養母之堂
陳睦州織屨供親朗法師荷檐遊學然則出家者以
法味爲甘味不忘返哺之心以佛事爲勤勞未遺世
諦之禮非但一世父母而多生父母皆報不惟一身

父母而法界父母皆度同登覺岸豈非周公之配天
普示迷津故逾考叔之純孝出家之孝其利博哉如
或因緣未和父母不聽宜盡在家之孝勸修出世之
因若能即俗而真亦有成佛之路觀反及嬰兒之行
無虧膝下之嚴報雙親顧復之勞致一乘圓滿之地
遂使在家菩薩行解無疑出俗高人因斯可鑑其有
局於事佛不能盡於事親觀茲有感于中可以克全
其孝嗚呼光陰易往父母難忘有親在堂如佛在世
以此報親之德圓成念佛之功是知父母喜歡則諸
佛喜歡此心清淨則佛土清淨可謂野色更無山隔

斷月光直與水相通

奉事師長

古德云生我者父母成我者師友是知師者迷途之
明導暗室之慧燈苦海之舟航人天之眼目恩逾父
母德重乾坤弟子所以事師不敢慢易也豈不見捨
全身而求半偈斷一臂而叩真乘以身為座而奉師
腰石負眷而續祖賣心肝而學般若投火聚以證菩
提方之古人深為慶幸奉師學道可不勉哉應知出
世投師須求正見叅方請益莫附邪宗要明罪福之
目由審辨正邪之利害正則成佛邪則成魔打頭不

遇作家到老翻成骨董是以如來知師非而捨去夫
子擇善者而從之觀古聖之如斯何今人而不爾况
當末運多有邪師凡欲修行切莫親近但存正念終
值明師要了大緣慎勿容易是故弟子事師即同事
佛也可謂四事供養敢辭勞萬兩黃金亦消得

皈依三寶

佛為三界大師法是羣生眼目僧乃六和上士并為
真淨福田背之則邪順之則正神功莫并聖力難思
除苦如藥鼓落鏃脫難若霜劍突圍變苦為樂而剎
那革凡成聖而頃刻是以火車相現皈依而便獲清

涼地獄將臨稱念而悉皆離苦普明與諸王免難空
定功焉帝釋却頂生之威般若力也所以信心佛子
皈依三寶真慈香花供養於佛僧讀誦流通於法寶集茲
善利回向菩提普暨衆生同生淨土不見道頻迦鸚
鵡稱念而得生西方諸天帝王欽敬而誓求聖道皆
能上成佛果下脫苦輪可謂禪是大偽詩是朴大唐
天子只三人

發菩提心

無上佛果名曰菩提若發此心決定成佛淨行法門
曰九修淨土須善發心若爲自己厭五濁忻九品則

淵月堂熙燦

違菩提心是聲聞行不應發也若爲衆生起大悲心
求往彼國希速成就道力神通徧歷十方救度一切
令共成佛則順菩提心是菩薩行應當發也今勸淨
業高流凡欲利己利他須是發心立志應於三寶前
虔奉香花志心發願云南無佛南無法南無僧弟子
某從於今日發此大心不爲自求人天福報緣覺聲
聞乃至權乘諸位菩薩唯依最上乘法發菩提心願
與現生父母及多生父母法界衆生一切怨親同生
淨土皆得不退轉於阿耨多羅三藐三菩提如是三
說此心時時要發日日常然所以善財一生證果龍

女八歲成佛地獄發心頓超十地沙彌發意已越二
乘可謂一氣回元運恩添萬物深

受持戒法

既發菩提心應修菩薩行初受三皈次持五戒漸修
十種善法圓滿三聚律儀根熟則全持根生則分受
年有三善月有六齋如戒五戒難行且除酒肉二味
十重易犯且持不殺一門輕塵積穢墜露添流一滴
下崖終歸大海故涅槃經云佛在世日以佛為師佛
滅度後以戒為師梵網經云戒如明月日亦如瓔珞
珠微塵菩薩眾由是成正覺所以龍無犯殺之心狼

印虛堂性惟

有持齋之意比丘苦節至於繫艸護鵝居士病緣終
不飲酒食肉是知諸善之本五戒為先王者履之以
治國君子奉之以立身不可造次而離不可須臾而
廢佛稱五德儒謂五常在天為五星在地為五嶽在
人為五藏在處為五方廣而言之無所不統仰觀俯
察莫能加焉故法苑珠林云世俗所尚仁義禮智信
也貪識所資殺盜婬妄酒也道俗雖乖漸教通也正
法內訓必始于因此則在乎實法指事直言不假飾
辭託名現意如斯而修因不期果而果證從茲而入
道不羨樂而樂彰今見持戒不殺不求仁而仁著守

戒不盜不忻義而義敷不淫者不忻禮而禮立不安者不慕信而信揚不飲者不行智而智明非但律已防非亦以助國揚化欲修成於淨行須嚴護於戒根可謂萬善和融同佛土熙熙長樂太平時

慈心不殺

卵胎濕化飛走蟲魚皆未來諸佛之流或過去多生父母至於顛顛怖死汲汲貪生避苦而樂其身此情一等永安而眷其命斯理萬均何乃聲哀哀而牽上刀砧眼睁睁而驅就死地或張羅互野布網連山火逐嶺以高低烟隨處而踈密疾雷之鷹爭舉追風之

禮峯堂學潤

馬競前猿覩箭以魂飛雁看弓而膽落解頭陷腦之酸難抵洞脊徹骨之痛奚禁况斯等共稟五行俱含四象同沾佛性共有神明何乃陳此肉山樹茲炮烙充其口腹美彼心肝殊不知斷其命者是出佛身之血食其肉者寧非父母之身造殺害之深尤斷慈悲之種性生前福壽暗裏消磨死後沉淪刀山劍樹還作雞猪魚兔次第填償至於宰割烹炮因果相似諦觀食肉可謂寒心縱售易於屠門亦難逃於重罪菩薩寧當破骨終不食噉衆生是以白兔焚身而仙人不顧也草尚不拔肉豈容嘗遠彼庖厨有聞聲不忍

之訓養他出賣同口殺心食之尤大聖垂慈所以制戒永斷殺生其德大也修淨土人故當持守可謂不貪香餌味始是碧潭龍

修十善業

夫大乘玄要元不離於一心淨業正因必先修於十善斷身口七重之罪七行斯成滅意識三毒之根三學自備彌陀經內求淨土者之所當修華嚴經中離垢地者乃能親證人天至於有頂以十善為受生之緣聲聞以至佛乘由十善為入道之本弗遵佛制墮三塗之要門縱得人身獲二種之惡報不修乃十不善

海真堂鏡佑

道奉持為十戒法門實乃淨土鎡基普勸常修此行是菩薩之法苑宜令安住其中可以至無畏大城可以登不退轉地功德詎可思量佛子所以當學

深信因果

擬步玄途洗心大道深信世間因果究明出世根源將窮其源必存其要要在用者其於心法乎心也者彌綸於萬行會通於羣數蓋以心無常法乘善惡而迭用以罪福為影響故因果不相違是知涉境而動謂之因動而生識謂之緣緣起則有業相隨有業則果報定矣是以善行惡行世間之因也三界六道

九有死生世間之果也念佛法門出世間之因也九
品化生淨土成佛出世間之果也於上因果心中明
了故不樂著世間之法於出世間法心行不違念念
不忘於淨土心心不離於彌陀何以知其然如今是
因臨終是果應知因實果則不虛夫善惡二輪苦樂
二報皆三業所造四緣所生六因所成五果所攝若
一念心瞋恚邪淫即地獄業慳貪不實即餓鬼業愚
癡闇蔽即畜生業我慢貢高即修羅業堅持五戒即
人業精修十善即天業證悟人空即聲聞業知緣性
離即緣覺業六度齊修即菩薩業真慈平等即佛業

大演堂守察

若心淨則香臺寶樹淨刹化生心垢則丘陵坑坎穢
土受形皆是等倫之果能感增上之緣是以離自心
源更無別體維摩經云欲得淨土但淨其心故知一
切歸心萬法由我欲成淨果但行淨因又當知聞提
邪見定應墮千劫泥犁誹謗撥無即此是邪魔眷屬
觀報應之若是如影如形信因果之歷然可驚可懼
所謂苦瓠連根苦甜瓜徹蒂甜

讀誦大乘

既慕西方當求了義暗中有寶無燈照終不自知古
鏡埋塵不揩磨豈能光顯調和三業躰究一心恭奉

真文研味聖意深入法源之底洞探諸佛之機理路
豁通心花瑛現不見道倚松之葛上聳千尋附托勝
因方能廣益譬夫桂生高嶺零露方得滋其華蓮出
綠波飛塵不能污其葉雖蓮性自潔而桂質本貞良由
所附者高則微物不能累所憑者淨則濁類不能沾
夫以卉木無知尚猶資善而成至善人倫有識得不
因心而證佛心豈不聞智者誦法華見靈山之未散
圭峯讀圓覺忽心地以開通達本情忘普庵契華嚴
之旨應無所住六祖悟般若之宗觀先德而可遵豈
今人而不學可謂渡河須用筏到岸不須船

勸進行者

夫學佛初門大悲是菩薩正轍利他要行勸進乃淨
業勝因晋社群賢願祈生於安養十方海衆忻出離
於娑婆痛嗟生死之難逃堪嘆無常之期速可不景
行前哲導彼後昆哉勸一人二人以至多人是佛門
之法施念一佛二佛以至萬佛趣樂土之玄猷日課
千聲佛名積月至年則有三十六萬聲佛積而不怠
亦幾於佛地乎日行小善一事積月至年則有三百
六十善事積而不怠亦幾於君子乎爲愚爲小人而
不通懺悔同禽獸者良由不學亦無勸進之人也經

言若人以四天下七寶供養佛及菩薩緣覺聲聞得
福甚多不如勸人念佛一聲其福勝彼此世尊之勸
進也語云已欲立而立人已欲達而達人此仲尼之
勸進也勉爾同盟熏陶淨行或正月五月九月爲一
集或半年一年三年爲一期深植善根普皆回向常
爲道侶更互相資一人退惰則協力提攜一人捨凡
則適相照顧雖不弘教利物物亦可以溫故知新豈
不見施人一錢人稱受惠益人一語彼豈無知財施
則濟一世之貧食施則濟一日之飢法施則令人出
世其功德詎可比倫財施如燈止明一室法施如日

華月堂圖一

徧照大千恪法而不勸修累劫沉於黑獄推己以行
化導現生則是阿彌敢冀運慈速相勸諉以斯悲願
結此淨緣拔滯溺之沉流出輪迴之捷徑齊登樂土
圖報佛恩可謂未度者令度矣

廬山蓮宗寶鑑念佛正因卷第一終

十三

慧峯堂最性

廬山蓮宗寶鑑念佛正教卷第二十九章

念佛正教說

法界本無衆生衆生緣乎妄見如來本無言教言教
爲乎有情妄見者衆生之病言教者衆生之藥以藥
治病則病無不治以言覺妄則妄無不覺凡夫日用
而不知如來之道鮮矣故我能仁大覺愍群機之未
悟也於是仰惟大慈俯垂妙範華嚴頓示聲聞尚若
盲聾阿含委說菩薩未蒙獲益方等贊大般若蕩空
涅槃殊途同歸法華普皆受記於是群經森列偏贊
西方蓋以阿彌陀佛願廣緣強法尊理備而然爾其

教也指佛國為歸趣華池寶地勝妙莊嚴令忻彼而厭此也其理也示彌陀即自性念念圓明心心實相如大海之混百川也其行也開示十六觀門攝心妙境了性相空如明鏡之見面像也其果也九品次第化生普攝利鈍登不退埵至無上之菩提道也是故九界衆生以無所得心而修佛國妙行不亦宜乎如來出世之懷於斯盡矣偏贊之辭有其旨焉真百千三昧之要門乃一實境界之直道論事儀則懺六根雪三業究宗旨則空萬法了一心是謂超苦海之捷舟救急病之良藥信斯道者開本覺心出五濁苦

達真淨土了性彌陀若明月之當空似蓮花之出水故蓮宗之教以是名焉揚無為言蓮者出乎淤泥不捨衆生界也處空無染顯露清淨體也華而有實非魔境也華實同時因果一如也華開蓮現示權顯實也華落蓮成廢權立實也一蓮生無量華建立一劫法也十方同一華嚴示佛境無異也蓮教之義得非是歟所以興慈運悲者遊戲於常光之界戒珠義海者涵泳於解脫之淵是以天龍護持王臣致敬古今不墜其化士民仰慕其風非夫大悲願力撫哀末習其孰能臻此哉是故龍樹論證之晉賢社修之天台

宗卷二
判釋之慈恩通贊之慈照集而懺之宗坦疏而解之
宿衲名儒奉之者寶珠有集高賢達士修之者簡編
有題於戲大法下衰去聖逾遠事佛者衆謀道者稀
競聲利爲己能視流通爲兒戲遂令法門凋瘵教網
傾頽實賴後賢克荷斯道普興七軀爲法潔已倚師
欲達真乘須親教典稟教乃能明理明理然後修行
行願無虧道果可證故知耳聞目見當依四法以思
修口誦心違縱解千章而何益是乃心以教照佛以
念持非以戒防罪以懺雪道以實踐動以禮行近則
期於立身揚名遠則希於革凡成聖發揮佛之道

霽月堂寶成

捨我輩而誰欵堅秉慧刀裂開魔網飲正法之甘露
伐邪見之稠林避惡友如避虎狼事良朋如事父母
謹守志節毋退大心正覺可遵非道莫履有過務速
改有善勿矜誇自然與禍斯違與福斯會現居塵世
則人敬之天祐之他日淨方則聖可期道可至豈在
乎相形問舍諂求榮達之時又何必望影瞻光卜度
終歸之日此匪道人之見識實乃凡庸之妄情莫循
他求但依本分在當仁而不讓宜見賢而思齊名利
不足動於懷死生不足勞其慮欲功成而志遂必自
邇而涉遐當驗果以推因信有作而有報智足以照

惑明足以燭幽言斯可法行斯可樂德義可尊進退
可度辨偽識真若試金之美石除昏覽物猶照世之
真燈是大導師作不請友擲出龍宮之寶均施群生
撒開祖門之關普容來者蠲滌邪病指歸妙源俾昏
鏡以重磨若垢衣而再淨使真風復振福及大千覩
慧日增明輝騰萬古可謂法王之真子可謂大丈夫
焉以此而奉西方大聖人之教者復何愧歟

佛為父王說念佛

寶積經云世尊父王頂禮佛足一心合掌而白佛言
云何修行當得諸佛之道佛言一切眾生皆即是佛

大月堂智聰

汝今當念西方世界阿彌陀佛常勤精進當得佛道
王言一切眾生云何是佛佛言一切法無生無動搖
無取捨無相兒無自性可於此佛法中安住其心勿
信於他爾時父王與七萬釋種聞說是法信解歡喜
悟無生忍佛現微笑而說偈曰釋種決定智是故於
佛法決信心安住人中命終已得生安樂國面奉阿
彌陀無畏成菩提

善財五十三叅首見德雲比丘說念佛門

華嚴經入法界品云德雲比丘告善財言善男子我
得自在決定解力信眼清淨智光照耀普觀境界離

宗卷二
一切障具清淨行往詣十方供養諸佛常念一切諸佛如來總持一切諸佛正法常見一切諸佛隨諸衆生種種心樂示現種種成正覺門於大衆中而師子吼善男子我惟得此憶念一切諸佛境界智慧光明普見法門所謂智光普照念佛門令一切衆生念佛門令安住力念佛門令安住法念佛門照耀諸方念佛門入不可見處念佛門住於諸劫念佛門住一切時念佛門住一切刹念佛門住一切世念佛門住一切境念佛門住寂滅念佛門住遠離念佛門住廣大念佛門住微細念佛門住莊嚴念佛門住能事念佛

幻應堂永昕

門住自在心念佛門住自業念佛門住神變念佛門住虛空念佛門

智首菩薩說念佛

華嚴經云一切威儀中常念佛功德晝夜無暫斷如是業應作

龍樹大士勸念佛

大智度論云佛是無上法王諸大菩薩爲法臣諸臣所尊重者惟佛法王是故菩薩應當念佛又云有諸菩薩自念往昔謫般若隨惡道經無量劫雖修餘行未能得出後遇善知識教行念佛三昧即得併遣罪障

方得解脫又偈云若人願作佛心念阿彌陀即時為
現身故我皈舍禮

念佛功德有七種勝

甘露疏云一詞少易行勝唯稱一句南無阿彌陀佛
一切人可念故二念緣佛境勝一心緣念佛身相好
淨國為境故三離難獲安勝諸佛菩薩加護念佛者
無諸患難安慶吉祥四稱名滅罪勝念佛一聲滅八
十億劫生死重罪五持念獲福勝稱佛一聲勝四天
下七寶供佛及阿羅漢六果感見佛勝衆生念佛必
定見佛七親迎往生勝化佛菩薩放光迎接行者往

生佛土

修持法門

夫無為境界迥絕名言有漏色心要憑修證真如具
含衆德方便而有多門上自離相平等下至十念稱
名總括不離三乘往生真符九品有念終歸於無念
有生真至於無生可謂一句彌陀群機普應

離相念佛三昧無住法門

慈照宗主云離相念佛三昧者上根智人悟此深理
常運虛空平等心無我人衆生壽者相經云離一切
諸相即名諸佛論曰我以計內人以計外衆生以續

前爲能壽者以續後爲義既無內外前後執心則一
劫諸相悉皆空寂故經云知無我人誰受輪轉亦無
身心受彼生死是名離相念佛三昧此則見一切衆
生本性皆同彌陀既不執有相無相二邊亦無有斷
見常見之說由是念念彌陀出世處處極樂現前如
此念者無念之念念則真如無生之生生則實相故
知無念卽離念實相乃無相無相則無住無住則入
佛境界此乃無上正真大菩提道若到此地無修無
證無生死可脫無涅槃可求性相俱空聖凡齊等無
佛道可成無衆生可度無已靈可得一念無爲十方

庸庵堂史愚

坐斷無一法亦有無一法始成自他互收事理無礙
塵塵具足剎剎全彰法本如然思議莫及可謂十方
薄伽梵一路涅槃門

天台念佛三昧三觀法門


智者大師云諸佛教理旣明非觀行無以復性乃依
一心三諦之理示三止三觀一一觀心心念念不可得
先空次假後中離二邊而觀一心如雲外之月者此
乃別教之行相也又云破一切惑莫盛乎空建一切
法莫盛乎假究竟一切性莫大乎中故一中一切中
無假無空無不中空假亦爾卽圓教之行相也如西

天伊字三點首羅天之三目非縱非橫並列故三觀
圓成法身不素卽免同窮子也龍樹菩薩偈云因緣
所生法我說卽是空亦名爲假名亦名中道義斯與
楞嚴圓覺經說奢摩陀三摩鉢提禪那三觀名目雖
殊其治一也亦曰三諦天然之性德也中諦者統一
切法真諦者泯一切法俗諦者立一切法舉一卽三
非前後也含生本具非造作之所得也秘藏不顯蓋
三惑之所覆也無明翳乎法性塵沙障乎化導見思
阻乎空寂然茲三惑乃躰上之虛妄也由是立乎三
觀破乎三惑證乎三智成乎三德空觀者破見思惑

玄隱堂太和

證一切智成般若德假觀者破塵沙惑證道種智成
解脫德中觀者破無明惑證一切種智成法身德非
各別也非異時也天然之理具諸法故然茲三諦性
之自爾窮理盡性故與禪宗異而非異也行者念佛
之時意根爲曰白毫圓光爲緣所起之念卽所生法
諦觀念佛心起卽是假名躰之卽空洞覽此心有如
來巖離邊顯中若根若塵並是法界諸佛衆生一念
普應卽邊而中無佛無念此乃大乘圓修三觀念佛
也可謂無相無空無不空卽是如來真實相

三觀大一總相之圖



担不成團
撥不開者
來者去轉
成豈人人
若到豈田
地三觀元
來是禍胎

空觀念佛三昧無念法門

空觀念佛三昧者即祖師序云思專想寂志一不撓氣虛神朗無幽不徹入斯定者昧然忘知塵累頓消滯情融朗非天下至妙孰能與於此哉智者大師以空觀而蕩一切法故云一空一切空無假無中而不空八此觀者是審實真諦也今欲令行人反妄歸真故謂之從假入空觀蓋假者是八空之詮先觀一切法是假乃至四大五蘊六根六塵六識盡十方世界山河大地皆無一物了知虛妄而得會真故名二諦觀修此者先要攝心靜坐將世間一切虛妄不實境界

德月堂慧日

盡情掃蕩俱不住著惟觀於空故般若經云內空外
空內外空空空空亦不可得如是頓入如來寶明空
海性覺真空卽如來藏空性圓明靈光遍照法界性
故如摩尼珠 隨意出生如大溟海深廣含攝平等
性智名佛知見可謂諸行無常一切空卽是如來大
圓覺

日觀念佛三昧專想法門

觀無量壽佛經云佛告韋提希汝及衆生應當專心
繫念一處想於西方凡作想者一切衆生自非生盲
有目之徒皆見日沒當起想念正坐西向諦觀於日

慧庵堂性慧

令心堅住專想不移日欲沒時狀如懸鼓旣見日已
開目閉目皆令明了是爲日想名曰初觀行人入此
觀者須於靜處屏絕外緣正坐攝心諦觀日輪現在
目前注心一境凝然寂靜如對明鏡自覩面像心若
馳散制之令還心息住定卽得三昧可謂海底金烏
天上日眼中瞳子面前人

叅禪念佛三昧究竟法門

遠祖師禪經序云禪非智無以窮其寂智非禪無以
深其照禪智者照寂之謂其相濟也照不離寂寂不
離照感則俱遊應則同趣慈照云寂而常照照而常

寂常冥常照名常寂光念佛之人欲參禪見性但依此法要於靜室正身端坐掃除緣累截斷情塵瞳開眼睛外不着境內不住定回光一照內外俱寂然後密密舉念南無阿彌陀佛三五聲回光自看云見性則成佛畢竟那箇是我本性阿彌陀却又照覷者只今舉底這一念從何處起覷破這一念復又覷破這覷底是誰○叅良久又舉念南無阿彌陀佛又如是覷如是叅急切做工夫勿令間斷惺惺不昧如雞抱卵不拘四威儀中亦如是舉如是看如是叅忽於行住坐卧處聞聲見色時豁然明悟親見本性彌陀內

外身心一時透脫盡乾坤大地是箇西方萬象森羅無非自己靜無遺照動不離寂然後興慈運悲接引未悟悲智圓融八無功用行得上品名實報莊嚴土得一切種智可謂萬古碧潭空界月再三撈漉始應知

攝心念佛三昧調息法門

大集經賢護品云求無上菩提者應修念佛禪三昧偈云若人專念彌陀佛誦曰無上深妙禪至心想像見佛時即是不生不滅法坐禪三昧經云菩薩坐禪不念一切惟念一佛即得三昧初機修習未免昏散

二病復假對治人天寶鑑云凡修禪定即入靜室正身端坐數出入息從一數至十從十數至百百數至千巧此心兀然此心寂然與虛空等不煩禁止如是久之息自住不出不入時覺此息從毛孔中八巧四千雲蒸霧起無始已來諸病自除諸障自滅自然明悟譬如盲人忽然有眼甬時見徹不用尋人指路也今此攝心念佛欲得速成三昧對治昏散之法數息寂要凡欲坐時先想己身在圓光中默觀鼻端想出入息每一息默念南無阿彌陀佛一聲方便調息不緩不急心息相依隨其出入行住坐卧皆可行之

坤命甲午生韓氏

勿令間斷常自密密行持乃至深入禪定息念兩忘即此身心與虛空等久久純熟心眼開通三昧忽甬現前即是惟心淨土

一相念佛三昧專念法門

大般若經云曼殊室利白佛言菩薩修行何法疾證無上菩提佛言菩薩能正修行一相莊嚴三昧疾證菩提修此行者應離喧雜不思眾相專心繫念於一如來審取名字善想容儀即為普觀三世一切諸佛即得諸佛一切智慧天台十疑論云一切諸佛悉皆平等但眾生根鈍濁亂者多若不專心繫念一佛則

心散漫三昧難成故專令念阿彌陀佛即是一相三昧寶王論云修持一相念佛三昧者當於行住坐卧繫念不怠縱令昏寐亦繫念而寢覺即續之不以餘業間斷不以貪嗔等間隔隨犯隨懺悔不隔念不異念不隔日不隔時念念常不離佛念念清淨圓明即是得一相三昧也可謂是若了一萬事畢

六時念佛功德回向法門

遠公祖師東林結社僧俗同修大智上賢深八禪觀得念佛三昧中流之士六時修禮淨土回向西方唐有詩云遠公獨刻蓮花漏猶向山中禮六時凡修此

清信女圓覺華張氏

法先於淨室安置佛像香花燈燭隨分供養澡浴塵垢著清淨衣每日於日初時日中時日沒時夜初時夜半時夜終時自對三寶端身合掌信禮西方每一時目覩慈容稱念南無阿彌陀佛聖號一千遍禮佛四十八拜念西方文發願回向每日晝三夜三六時行道精專不倦志意修持堅固行願淨業圓成他日必得中品中生矣

懺罪念佛功德繫念法門

大彌陀經云我作佛時十方無央數世界諸天人人民聞我名號燒香散花燃燈懸繪飯食沙門起立塔寺

齋戒清淨益作諸善一心繫念於我雖止於一晝夜
不絕亦必生我刹不得是願終不作佛又云我作佛
時十方無央數世界諸天人民以至蜎飛蠕動之類
前世作惡聞我名號即懺悔爲善奉持經戒願生我
刹壽終皆不經三惡道徑遂往生一切所欲無不如
意不得是願終不作佛凡修持者先當嚴淨壇場燒
香然燈廣設供養請一比丘及諸上善人同壇尊證
白佛陳意絕慮去憂勿預家事勿近內人齋戒修持
繫念彼佛名號一晝一夜每佛一千聲誦彌陀經一
卷如是三次志心懺悔回向云我今自憶有生以來

清信女淨眼華李氏

造諸惡業願此念佛功德得入如來大誓海中承佛
慈力衆罪消滅冤尤釋除三業所生一切諸善莊嚴
淨願福智現前願得臨命終時自知時至身無病苦
心不顛倒如入禪定於一念頃徑生西方極樂國土
見佛接引於七寶池中蓮花臺上蒙佛授記得聞經
法頓開佛慧廣度衆生滿菩提願可謂水向石邊流
出冷風從花裏過來香

晨昏念佛功德信願法門

在家菩薩奉佛持戒逐日營辦家緣未能一心修行
者須是早起焚香參承三寶隨意念佛每日黃昏亦

宗卷二
如是禮念以為常課如或有幹失時次日當自對佛懺說此之法門要且不妨本業為士者不妨修讀為農者不妨耕種為工者不妨作務為商者不妨買賣晨叅夕禮之外更能二六時中偷那工夫持念佛號百聲千聲志誠為功期生淨土回向云弟子某禮念功德願命終時徑生淨土蓮花池畔親見彌陀寶樹行中相逢善友普為父母師長法界衆生同滿此願可謂積塵成巨嶽滴水漸成河

簡徑念佛功德十念法門

慈雲式懺主云在俗人塵務忙冗每日清晨服飾已


清信女大光華鄭氏

面西合掌念南無阿彌陀佛盡一口氣為一念如是十念但隨氣短長氣極為度其念佛聲不高不低調停得中如此十念連續不斷意在令心不散專精為功顯是藉氣束心也回向云某一心皈命西方阿彌陀佛願以淨光攝我我今稱如來名經十念頃求生西方佛昔本誓若有衆生欲生我刹十念我名若不生我國者我誓不成佛今以十念功德願命終時心不顛倒於一念頃生極樂國聞佛妙法速證菩提可謂信心如不退決定禮金僊

慈照宗主圓融四土選佛圖序

夫寂光同居一智無殊情生彼此見有親踈覲面了
 色空性如如本無二路自見妙龜吾不如是一体毗
 盧先須識本免被茶糊行有行相智有智模願有願
 力進有程途惺惺寂寂如淨明珠照徹心体凡聖同
 途四土合轍三身一如頭頭淨土處處阿彌且山僧
 因見四土混亂無綸智轉行融致使利鈍不分因果
 俱失只言淨土不知淨土高低只說唯心不知心之
 深淺故見諸家相毀各執一邊誰知自破宗風非魔
 能壞今則畧開一線述出四圖削去迷情頓明心地然
 後河沙法界該收一紙之中無量法門出乎方寸之內耳


圓融四土總相之圖



自性彌陀佛
 唯心淨土機
 悟來唯一念
 迷後歷三祇
 折攝二門設
 聖凡一路歸
 世情看冷暎
 人面逐高低

凡聖同居土

三光具足



如磨序出身

願三宗勝情
不德用劣未
退迷躰應除

凡聖情差智有殊

須憑修證契毘盧

恐人力少行疲倦

權指西方住半途

橫出三界少人知易修易往勿狐疑

塵垢未除求解脫一心信願念阿彌


臨終正念分明去三朝七日預知時

既生淨土常聞法何愁不得悟心機

具念橫須陀洹八
煩成出及其人尺
惱就三及人九
生界天所見身居

此土但有信願念佛不斷煩惱不捨家緣不修禪定臨命終時彌陀接引
皆得往生淨土便獲神通得不退轉直至菩提凡聖同居土者乃自他受用
三光具足總攝四土九品化生據理後三土皆在其中不別出而祇引下
品者蓋祖師明其易修易往也其餘品位高低各隨行願修證而成也
方便勝居土

如星之光



如邊功出身

斷除煩惱絕蹤由

滅智灰心罷便休

寶所不能前進步

如來方便故相留

豎出三界聲聞性

煩惱塵勞急斷除


八定四禪頻觀鍊

永超凡世不還歸

行解脫
不脫用
德宗身
退宗身
智切一
惑思見
生等關
界三出
等所見
身金六
居漢羅

此土皆是定性小乘根性怕怖三界如虎鬼龍蛇破見思惑殺貪嗔癡斷如
來種如獐獨跳不顧後群偏執小見沉空滯寂生方便土如來純說大乘調伏
實報莊嚴土
心法微微猶未遣
應知情盡始除根
貼肉汗衫既未脫
纖塵猶礙大乾坤
非橫非豎理偏宜
三觀澄心進莫疑
一力未能超彼岸

如月之光



依然還落聖賢機

如科選出身

依然還落聖賢機


智般用圓道
不若宗滿種
退德躰報智
破塵三心非
沙惑克豎萬
分破備出千
無明生界好
三三三三三
破塵三心非
沙惑克豎萬
分破備出千
無明生界好
三三三三三

此土皆是大乘圓修三觀十住十行十向十地等覺法身大士
如塵若沙各各分破無明分身十方八相成道度脫衆生皆未
究竟天台賢首教委明

常寂光淨土

境智如如絕證修

如之日如




如灌頂王子出身

無心身滿塵沙界任運攝將諸子歸

退不位
德身法
用体宗
身法淨清
智種切一
盡感三破
生不念一
頂透闕衝
真正上無
見所佛諸
身界法
居人果


此土是寂上乘境界感盡情忘諸法不生般若不生不生不生
名大涅槃究竟居涅槃山頂端居常寂光土名清淨法
身毘盧遮那佛名到彼岸亦名空劫以前自己也

東 方 四 土




四土非方域
情生碍不通
悟迷分大小
淨穢隔西東
萬有形雖別
千機理自同
春風俱一拂
何處不花紅
大見始終無改
小見九品差殊
上智抵在一心
下智東西隔礙

西方四土



莫謂西方遠
 西方在目前
 雖云越十萬
 會不離三千
 念佛繞開口
 花池已種蓮
 信心如不退
 決定禮金僊
 西方是取相欣
 厭二門修若人
 從此入得一劫
 處皆淨土

觀心四土



阿鼻依正全處極聖之自心身土毘盧不逾下凡之一念智者云豈離伽伽
 別求常寂光土須知毘盧遮那徧一切處善觀心者一切萬法唯心本具耳

欲識天真佛
 從來絕證修
 不須外尋覓
 但向自心求
 悟後三身合
 迷時四不周
 莫生分別見
 直下息心休

夫終日寂光而未嘗寂光者凡夫也欲證寂光而未極寂光者菩薩也真是寂光
 而住持寂光者如來也常寂光淨土是離相心若到此地見一切處皆常寂光

西方

四土縱橫如帝網
一方流出弓般門
莫道西方無四土
品品周圓不可分

四土

恒沙

四土十方皆具足
恒沙刹海亦如之
聖凡因果周沙界
盡在凡心一念居

四土

圓融四土

一家四土在人心
不用他方遠處尋
但將此箇常照察
凡聖高低見淺深

目前四土

四土分明在目前
更無一物碍心田
迷雲消散長空淨
一月團圓照碧天

四土圓融不可分
應知分處不分分
雖然一所靈光寺
何妨佛殿及三門

三諦

從來西土本無踪
萬象森羅空不空
莫落偏邪妄分別
土土分明空假中

四土

相即

體宗及用三相即
舉一即三三是一
鼎分三足一不虧
日月星光幾曾失

四土

人人四土

凡聖尊卑體一同
情差隔碍不融通
悟則四皆全体現
迷來一土不知踪

絕待四土

四土人人皆悉有
從來迷妄不能知
今朝指出分明示
勸汝承當不可遲

四土橫論及豎論
更無纖芥可留存
若了州城元是郭
三家村裡不曾村

教是佛眼禪是佛心心若無眼心無所依眼若無心
眼無所見心眼和合方辨東西禪教和融善知通塞
當知機有利鈍法有開遮若定作一路收機都成謗
法四門入郭都至府前四土修心各登彼岸聽教之
士不可偏邪叅禪之流應如是會權實方便運用在
人惟宜事理融通不可執法而成病聞思修三慧戒
定慧三學各要反本還源盡欲革凡成聖今人不了
各執一邊只說教不通禪禪不通教本為去執及屬
偏情平等修心却生分別禪云黃花翠竹總是真如
教云一色一香無非中道勢至菩薩因念佛故自得

心開智者大師誦法華經得見真法是處各存妙道
豈在喧爭今要凡心與身土和融念佛與禪教一道
入門雖別到底是同休起愛憎莫分彼此各須究本
勿競枝條不可執實而謗權執權而謗實也

清涼國師云

塵勞業海

結惑堅執

情盡見除

不勞收拾

夫法報應之三身寂光同居四土各要歸源咸迴一
路一身三身四土一土非後非前無來無去情見有
差非佛隱覆祇許心傳不通言句周徧圓融無盡無
窮一真無礙重更重重帝珠莫喻梵網難同撥轉機

關八達四通不在伶俐唯假惺惺毘盧得道許汝便
成永絕生死即放光明若不擬議海晏河清

一土分四土土土各三身身土無有盡情見恰如星
如來無礙力似月在天輪州州皆見月處處有光明

後頌

大道通天下 明明幾百州州州各道路 路路合春秋
迷後三身別 悟來一也休 這般無彼此 莫把結怨讎

念佛提綱

本自無蹤無跡 方便與君拈出
有人問我何為 南無阿彌陀佛

中峯堂慧皓

念佛心開

因修三昧念彌陀 忽覩彌陀心上過
始覺行行皆寶所 方知土土悉交羅

禪教相成

天台賢首慈恩教 達磨南山意不殊
法門頭數無窮盡 不離毫端絕妙處

三身体同

三德秘藏及三身 舒卷臨機分不分
處處融通無罣碍 勿教一向作三人

三寶不異

佛法僧寶最為真

豈異而今一點靈

舉一即三三是一

莫教錯認定盤星

身土不二

毘盧即是寂光土

寂光即是太毘盧

身土本來無二相

皇城元是大京都

心佛無殊

此心即是彌陀佛

彌陀即是自心源

皆道蟾光有虧減

誰信從來日日圓

絕跡無相

一念圓明法界周

免向三祇著劫修

普潤

若也此中明了得

一點微塵也不留

情盡宛然

毘盧海藏全無跡

寂光妙土亦無踪

劫火洞然毫末盡

青山依舊白雲中

頭頭見道

寂光金寶及泥沙

到處無心便是家

了得箇中玄妙意

優曇元是白蓮花

處處逢源

心心念念彌陀佛

頭頭處處古毘盧

微塵刹海如星布

椽在山僧一畫圖

廬山蓮宗寶鑑念佛正宗卷第二終

廬山蓮宗寶鑑念佛正宗卷第三 八章

念佛正宗說

明教大師曰能仁之垂教也必以禪為宗而佛為祖
祖者乃其教之大範宗者乃其教之大統大統不明
則天下不得一其所詣大範不正則天下不得質其
所證夫古今之學佛輩競以其所學相勝者蓋由宗
不明祖不正而為患然非其祖宗素不明不正也後
世學者不能盡考經論而校正之乃有束教者不知
佛之微旨竝在乎言外諸禪者不諒佛之所詮既見
乎教內紛然自相是非古今何嘗稍息予嘗探大藏

或經或傳校驗其所謂禪宗者佛祖之心也佛說一大藏教未嘗不以心為宗也嗟乎衆生之根器異也又安得以一法而明之我佛平等設化於是對其病而投其藥耳且夫淨土一宗念佛之法有實有權有頓有漸皆以顯如來所證之實理廓衆生自性之本源以念佛三昧攝一切人明心見性入於佛慧或問之曰念佛其可明心見性入佛慧乎予謂之曰心為萬法之宗操之在我則何道不成大勢至菩薩以念佛證無生忍究其因地純於念佛上用功念念無間打成一片所以道都攝六根淨念相繼得三摩地斯

為第一蓋佛者心也念佛念心心不二心既不二佛佛皆然一念貫通無前後際三際俱斷是真道場塵塵顯示刹刹全彰是謂入於如來正徧知海具足如來一切種智念佛之旨大畧如斯遠公祖師得是三昧而以此三昧示一百二十三人同修同證思專想寂以至究竟吾祖於是深存遠圖大援羣生且以晉地新經未來禪法甘露國所未聞實相宗本人有異說乃命弟子踰越葱嶺遠迎禪師究尋經本故明教大師定祖圖云秦僧智嚴於罽賓國懇請跋陀羅偕來諸夏傳授禪法初至長安後至廬山遂出禪經

守卷三
與遠公同譯譯成遠公為之序跋陀羅嘗謂遠公曰
西土傳法祖師自大迦葉直下相承凡有二十七人
其二十六祖近世滅度名不如蜜多者所以繼世弟
子曰般若多羅方在南天竺國行化以此慧燈次第
相傳達磨多羅後為二十八祖我今如其所聞而說
是義遠公聞跋陀羅言故序云達磨多羅西域之雋
禪訓之宗寶林傳所謂跋陀羅嘗與遠公言其傳法
諸祖世數固驗於禪經矣故張野序遠公塔銘云心
禪諸經出自廬山師每謂禪法精微非才莫授功高
易進者唯念佛一門導之以止觀專之以淨業此假

修以凝神積習以移性入於如來無盡法門實由斯
矣故此淨土之教至于天台智者大師乃示三觀證
乎一心總縮三乘之要行普收五性之機宜直付觀
行之真財悟入如來之知見故知念佛之要者由觀
經為標指也斯經以佛國淨境為宗以觀智妙行為
趣以實相彌陀為體以滅惡生善為用是知無量功
德共莊嚴之種種勝行而歸趣之言說問答而詮辨
之譬衆星之拱北辰如萬流之朝東海也是故不提
不經地位頓證無生五逆十念補名便登極樂即圓
頓教之所攝也此之念佛三昧法門權實頓漸折攝

悟迷圓授一切會歸真宗猶車之有輪如鳥之有翼
入道之由可謂至矣可謂盡矣是以集夫正受之方
示彼修行宗要開明心目直指根源庶使念佛進修
之士明其宗而不昧其祖也若夫一句當機淨土唯
心顯矣

定明宗躰

慈恩通贊云此方先德總判經論有其四宗一立性
宗二破性宗三破相宗四顯實宗但槃華嚴法華等
是顯於真實中道義故捨化城而歸寶所等故彌陀
經乃第四宗也依文判教教但有三以類准宗宗有

其八一我法俱有宗二有法無我宗三法無去來宗
四現通假實宗五俗妄真實宗六諸法但名宗七勝
義皆空宗八應理圓實宗故華嚴及彌陀經是八宗
收

李長者華嚴合論十種淨土權實宗體

夫滔滔智海茫茫莫究其涯淼淼真源蕩蕩罕尋其
際遮那法界體相總括於塵沙方廣靈門淨穢互叅
於無極但隨現修業用見境不同致使聖境乖違依
根不定或權分淨土於它國指穢境於娑婆或此處
為化儀示上方為實報文殊居東國金色世界而來

宗卷三
四
觀音處西方安樂妙土而至如是權儀各別啓蒙的
信無依今以畧會諸門令使創修有托約申十種以
定指南

第一阿彌陀經淨土此為一分取相凡夫未信法空
實理以專憶念念想不移以專誠故其心分淨得生
淨土是權未實

第二無量壽觀經淨土此為一分未信法空實理衆
生樂妙色相者令使心想想彼色相想成就故而生
佛土此權非實

第三維摩經淨土佛以足指按地加其神力暫現還

無是實報土未具陳廣狹是實未廣

第四梵網經淨土雖說一大花王而有千葉一一葉
上有百億化佛教化百億四天下衆生然彼千葉及
彼花王為三乘菩薩見未廣故分示報境未成圓滿
是權未實

第五摩醯首羅天淨土如來於彼坐蓮花座成等正
覺以為實報此閻浮提摩竭提國菩提場中成等正
覺者是化此為三乘權教菩薩染淨未亡者說此閻
浮提及六天等是欲界有漏彼上界摩醯首羅天是
無漏故心存染淨彼此未忘此為權教未為實說

第六涅槃經云指淨土如來有實報淨土在西方過三十二恒河沙佛土者為三乘權教一分染淨未亡者言此三千大千世界總是穢土權推如來報境淨土在西方此權非實

第七法華經三變淨土此為三乘權教菩薩染淨未亡者言移諸天人置於他土是權非實

第八靈山會所指淨土此引三乘中權教菩薩染淨未亡者令知此土即穢即淨諸眾信可未能自見是實非權

第九唯心淨土自證自心當體無心性惟真智不念

淨穢稱真任性心無罣碍無貪無痴任大悲智安樂眾是實淨土以自淨故令他亦淨是故維摩經云隨其心淨即佛土淨欲得淨土當淨其心是實淨土第十毘盧遮那所居淨土即居十佛刹蓮花佛國土淨穢總含無穢無淨無有高下彼此自他之相一一佛土皆充法界無相障隔畧言十佛塵刹國土為知無盡佛國不出一塵為無大少故不立限量故以法為界不限邊際相海純雜色相重重此實淨土非實權收

念佛叅禪求宗旨說

慈覺贖禪師云念佛不礙叅禪叅禪不碍念佛法雖
二門理同一致上智之人凡所運為不著二諦下智
之人各立一邊故不和合多起紛爭故叅禪人破念
佛念佛人破叅禪皆因執實誦權執權誦實二皆道
果未成地獄先辦須知根器深淺各得所宜譬如營
田人豈能開庫開庫人安可營田若教營田人開庫
如跛足者登山若教開庫人營田似壓良人為賤終
無所合也不若營田者且自營田開庫者且自開庫
各隨所好皆得如心是故念佛叅禪各求宗旨溪山
雖異雲月是同可謂處處綠楊堪繫馬家家門首透

長安

淨土非鈍根權說

天台思梵講主久居臨平山解行明峻深造教觀性
相淵源每與士大夫往復隨有所問答釋粲然一日
有通判鄭公問曰教中所明念阿彌陀佛願生淨土
此專為鈍根方便權說上根頓悟一超直入佛地豈
假他佛淨土耶師云吾宗先達呵此說云佛在世文
殊普賢佛滅後馬鳴龍樹此土智者大師智覺禪師
皆願往生淨土應是鈍根乎若以此為權教將何為
實耶昔孫莘老亦疑於此因會揚次公王敏中辯論

遂息此疑信此淨土非聖人之權設是圓實之真宗也注念彼佛必生淨土斯乃稱性實言非權教也

真歇了禪師淨土宗要

彌陀不離衆生心是三無別極樂遍在一切處舉一全收如帝釋殿上千珠寶網千珠光影咸入一珠一珠光影徧入千珠雖珠珠互徧此珠不可為彼珠彼珠不可為此珠然而不雜離而不分一一徧彰亦無方所彌陀淨土即千珠之一十萬佛國即一佛國各千珠之一聖人善巧方便示人專念阿彌陀佛乃千珠直指一珠見一佛即見十方諸佛亦見九界衆生

微塵刹海十際古今一印頓圓了無餘法矣

寂室大師示淨土寬見

不修淨業者云遊心禪定悟性真宗或聞說淨土必曰淨土唯我心既淨則國土淨何用別求生處寂室曰且維摩經中云如來以足指按地見娑婆國土悉皆嚴淨而衆會不見惟螺髻梵王得知今之說悟性者能如梵王所見淨土不況汝居卑室陋屋必羨之以大廈高堂脫粟藜藿者必羨之以珍羞上味弊袍短褐者必羨之以綾羅輕縠若云心淨土淨則不消如是分別也況當老病死苦世間違情之時顏色

與未悟者同是則口唱心淨土淨之言身被穢土苦惱之縛其自欺之甚也不然應須信教仰理於淨土從而修之

大智律師示念佛事理不二

師嘗為慈慧文法師作淨土集序其畧曰古今學佛多惑事理謂理則纖塵不立言事則萬象森羅凝心住寂則為理動用操修則為事遂引古云實際理地不受一塵佛事門中不捨一法斯迺理事敵立空有並馳予嘗變其語曰實際理地不少一塵佛事門中不存一法何則由實際理具一切法豈少一塵乎由

佛事門離一切相豈存一法乎如此方見理事一如空有不二矣

文法師淨行序念佛空要

夫達無心之有心識有念之無念有無不住能所胡存是則念念圓明心心虛寂苟昧斯旨則法成疣的契其宗則門門通妙今可無乖實際而示圓修俾負重致遠者獲遂於息肩流浪迷津者速登於彼岸求生西方無先念佛觀門者也予輒為修淨業者薄采經綸大綱述成西方淨行法門示彼所修令得其趣有觀茲文而復不能起信修行者類乎狂熱投圍唯

露一髮欲垂拯救末如之何

廬山蓮宗寶鑑念佛正宗卷第三終

廬山蓮宗寶鑑念佛正派卷第四 二十一章

念佛正派說

佛由心造道在人弘弘道之要無先乎念佛念佛則是正心正心故能合道道之宗極曰佛也佛者覺也一切衆生有此本覺之性自一念有差所以不覺裴相國云終日圓覺而未嘗圓覺者衆生也具足圓覺而住持圓覺者如來也是故薄伽梵成道摩竭陀說有談空觀根逗教於諸法之外別開念佛一門截衆苦之根源入聖流之要路故經云從是西方過十萬億佛土有世界名曰極樂其土有佛號阿彌陀國中

無三毒八難有七寶衆妙莊嚴以法為身群聖為友
苟能誠信發願歸心彼土者即得往生出乎三界九
有之表證諸佛無上妙道其言無所欺也粵自大教
東流至佛圖澄而盛由澄而得道安安之門有遠公
戒珠義海龍姿鳳章於是教門綱紀從茲大備師著
念佛三昧詠親勸于時晉賢慕師之德爭趨正覺之
場同究斯道名動帝王道尊一代彌天推為高第羅
什結為勝友識量廣大獨出於古今矣至夫抗言為
道為萬世宗師垂裕於人天者遠公也隋有智者魏
有曇鸞唐有善導大振宗風宋有坦公疏詮甘露省

常結社慈覺勸修壽禪師融萬善以同歸元宗主撮
諸經而成懺廣施方便曲盡慈悲故我祖師欲令大
地衆生見本性彌陀達唯心淨土普皆覺悟菩提之
妙道乃立普覺妙道四字為定名之宗觀夫四字一
鏡洞照無邊同一鉢用何以知其然總而言之喻如
人之一身而有頭目手足為其用也未嘗有一而可
分也自非願廣悲深而孰能取信於天下後世哉竊
嘗論之曰等衆生界名曰普智達斯理名曰覺德用
無邊名曰妙千聖履踐名曰道又普者即自心周徧
十方之體也覺者即自心智照不迷之用也妙者即

宗卷四
自心利物應機之行也道者即自心通達中正之理也恒沙諸佛所證者此道也歷代祖師所得者此道也十方生淨土者已學此道也未來修行者當學此道也又况諸佛菩薩示現世間作大導師各有悲願不捨衆生或為王臣將相居士宰官出俗在家逆行順化莫不以斯道而覺斯民也三果羣靈無量劫來至於今日往來六道如蟻旋磨無由出離佛祖憫彼故設方便以誘導之俾夫趣吾之所趣吾之所趣者非六道非三乘乃如來正覺之趣得吾所趣之道者亦以此道化乎未趣趣此所趣譬如一燈燃百千燈

續焰分輝騰今耀古此念佛之宗正心之法正夫羣生歸夫正道者矣彼彼相傳於無盡故名無盡燈也普覺妙道之說豈徒言哉蓋謂人人皆可作佛不以僧俗之間不以利鈍之分無彼此無高下等一性而已得之為悟失之為迷同一理而已迷而為凡悟而為聖迷者事隔理不隔也失者自失性不失也是知修念佛三昧者則是正其心也此心正則性順理也得性順理則六塵不能染萬境不能移動用於一虛之中寂寥於萬化之域不動本處而周遊十方超乎極樂之地休乎寂光之堂居乎涅槃山頂朝乎無上

法王普覺妙道正心之義其至矣乎不知此義者功
何所施智何所發譬彼無目之人昧於日月之光履
於重險之處墮坑落塹可勝紀乎噫去聖時遙人多
謬解雖其正道悉陷邪宗庸昏之徒含識而已致使
羣邪詭惑諸黨并熾是非蜂起空有云云夾截虛空互
相排毀有著於事相不肯捨者有順於應緣不自覺
者有守枯木而言定者有恃聰明而稱慧者有奔走
非道而言能者有假於鬼神而言通者有身心放曠
而言無礙者有口耳潛傳而言秘訣者有執我宗普
字覺字者有言彼宗妙字道字者是皆私偷此鏡入

彼邪域致為塵垢蔽蒙不明宗躰雖得此鏡之名而
不得其用也殊不知慈照立此四字深有意焉昧者
不知執之失度况又有言在家為彌陀教出家為釋
迦教者自尊為祖執法為宗存彼此之執心觸途成
滯局偏邪之劣解是已非他使我曹為佛祖後裔而
不能破其執遣其惑則何以揭慧日於昏衢哉痛心
佛祖慧命懸危甚於割身肉也念報佛祖深恩寢食
不遑安處也念諸方佛子錯路修行不啻倒懸也雖
未能盡古人之萬一然此心不欺也予嘗切切於是
謹按高僧傳記遍求前哲真踪究其源摘其實理之

所當事之所存者集而出焉虧者補之冗者削之隱者明之斷者引之庶千載之下修淨業者因言思道飲水知源識古聖之遺風躰先宗之標格紹隆佛種光闡微猷壽慧命於無窮傳真燈而有永前不云四字一鏡洞照無邊乎躰斯道者慎勿忽諸

遠祖師事實

師諱慧遠雁門樓煩人今河東代州姓賈氏生於石趙延熙甲午歲為晉成帝咸和九年師十二歲從舅氏令狐遊學許洛博通六經尤通周易莊老之書二十一歲欲渡江與范宣子俱隱值中原兵戈塞路聞

道安法師居太行山遂與弟慧持俱投之聽講般若經豁然大悟嘆曰儒道九流皆糠粃耳與弟投簪落髮常以大法為己任安嘆曰使道流中國其在遠乎孝武帝太元九年至廬山以杖卓地曰有泉當住忽泉迸出乃誅茅為庵講澹繁經感得山神獻靈資助材木雷雨闢地江州太守驚其神異奏立東林寺名其殿曰神運太元十一年寺成師以東南經律未備禪法無聞乃於寺內別置禪室請一禪師率眾習禪令弟子逾越沙漠求禪經庶江表四輩咸皆得以脩習願使大乘之化自此而南每謂禪法深微非才莫

授入道要門功高易進者念佛為先師徒眾往來三
千真信之士一百二十三人乃與劉遺民等十八賢
為上首於無量壽佛像前建齋立誓同修西方淨土
結白蓮社遺民著發願文師自製念佛三昧叙謝靈
運恃才傲物一見師肅然心服鑿池種蓮求入社師
以心雜止之山多蛇有行者不知何許人嘗侍於師
善馱蛇至今號辟蛇聖者師所居流泉巾寺下入虎
溪每送客以溪為界時陶淵明陸修靜師嘗送之語
道契合不覺過溪相與大笑後世因傳三笑圖焉時
羅什法師通書稱師為東方護法菩薩外國眾僧咸

稱漢地有大乘道士每燒香禮拜東向稽首獻心廬
嶽姚主欽承道德信向連接晉安帝隆安元年桓玄
勸帝沙汰僧尼謂廬山為道德所居不在搜簡師以
書抵玄得并免元興元年玄又伸庾冰之議欲沙門
盡敬王者復以書辯論其事遂免安帝自江陵旋京
輔國何無忌勸師候迎稱疾不起帝遣使勞問師表
以聞帝優詔答之義熙乙卯十一月初一日師入定
至十七日出定見阿彌陀佛紫磨黃金身徧滿空界
龍舒淨土文載遠公三觀聖相沉厚不言師三十年
影不出山跡不入俗丙辰八月初一日示疾至六日

困篤大德者舊請飲豉酒不許又請以蜜水乃命律
師檢箴未見而集諸徒遺戒曰吾自知命之年托業
此山自審有畢盡之期乃絕迹外緣以求其志不覺
形與運頹已八十三矣時至欲厝骨于松林之下即
嶺為墳與土木同狀此古人之禮汝等勿違苟使神
理不昧庶達其誠大哀世尊亦當祐之以道言訖而
逝門人與潘陽太守及官屬奉全軀葬于西嶺壘石
而塔焉安帝謚廬山尊者鴻臚大卿白蓮社土凝寂
之塔謝靈運立碑以銘其德張野序之有匡山集十
卷行于世

遠祖師歷朝謚號

晉安帝義熙年謚廬山尊者鴻臚大卿白蓮社主

唐大中戊辰年謚辯覺大師

南唐昇元三年謚正覺大師

宋太平興國三年謚圓悟大師

宋乾道二年謚等徧正覺圓悟大法師

明教大師題遠祖師影堂記

遠公事蹟學者雖見而鮮能盡之使世不昭昭見先
賢之德亦後學之過也予讀高僧傳蓮社錄及九江
新舊錄最愛遠公六事謂可以勸乃引而釋之列之

其影堂以示來者陸脩靜異教學者而送過虎溪是不以人而棄言也陶淵明耽酒于酒而與之交者蓋簡小節而取其達也跋陀高僧以顯異被擯而延且譽之蓋重有識而矯嫉賢也謝靈運以心雜不取而果歿於刑蓋識其器而慎其終也盧循欲叛而執手求舊蓋自信道也桓玄震威而抗對不屈蓋有大節也大凡古今人情莫不畏威而苟勉忘義而避疑好名而昧實黨勢而忍孤飾行而畏累自是而非人孰有道尊一代為賢者師肯以片言而從人乎孰有宿稟勝德為行耿潔肯交醉鄉而高其達乎孰有屈人

師之尊禮斤逐之客而伸其賢乎孰有拒盛名之士不與於教而克全終乎孰有義不避禍敦睦故舊而信道乎孰有臨將帥之威在殺罰暴虐之際守道不撓而存其節乎此故遠公識量廣大獨出於古今若夫荷負至教廣大聖道垂裕於天人非蒙乃能盡之其聖歟賢耶偉乎大塊噫氣六合風清遠公之名聞也四海秋色神山中聳遠公之清高也人龍僧鳳長揖巢許遠公之風軌也白雲丹壑玉樹瑤草遠公之棲處也蒙後公而生雖慕且恨也瞻其遺像稽首作禮願以弊文書于屋壁

廬山十八大賢名氏

遠公祖師諱慧遠姓賈氏鴈門樓煩人

永法師諱慧永姓繁河內人

持法師諱慧持遠公弟也與兄俱事道安法師

生法師諱道生出魏氏鉅野人客居彭城世衣冠

佛陀耶舍尊者此云覺明罽賓國婆羅門種

佛陀跋陀羅尊者此云覺賢甘露飯王之裔

叡法師諱慧叡冀州人

順法師諱曇順黃龍人

敬法師諱道敬琅琊王氏隨祖凝之守江州

恒法師諱曇恒河東人童子出家不知姓氏

曷法師諱道曷潁川陳氏

說法師諱曇說廣陵人不知姓氏

劉遺民諱程之字仲思彭城聚里人漢楚王之後

散騎常侍雷公諱次宗字仲倫南昌人

太子舍人宗公諱炳字少文南陽人

治中張公諱野字萊民

散騎常侍張公諱詮字秀碩萊民族也

通隱處士周公諱續之字道祖鴈門光武人

貫休禪師題十八賢影堂詩

白藕池邊舊影堂
劉雷風骨盡龍章
共輕天子諸侯
貴惟愛吾師一法
長陶令醉多招
不得謝公心亂入
無方何人到此思
高躅風點苔痕過
短墻

辯遠祖成道事

禮記曰先祖無美而稱之者是誣也有善而弗知者是不明也知而不傳者是不仁也此三者君子之所耻也噫在吾學佛之徒豈不然耶吾祖遠公行位昭昭功德廣大愚忝與其教為末流之裔不肖孤陋學淺才疎未能紹襲先宗實乃有孤慈蔭嘗讀明教記不亦甚慙乎又嘗觀石室琇禪師通論云去孔子百

年而有孟軻是時孔子之道幾衰焉軻於是力行其道而振起之伏自佛教東流凡三百年而有遠公是時沙門寢盛然未有特立獨行憲章懿範為天下宗師如遠公者佛道由之始振蓋嘗謂遠公有大功於釋氏猶孔門之孟子焉與高僧朝士同修淨社道勳帝王法流天下後之所習念佛者不知吾祖之本末失其源流多見世之薄福闡提輦偽撫廬山成道記裝飾虛辭盡是無根之語誑惑善信遍傳在人耳目逮今不能改革予乃參考大藏弘明集高僧傳察其詳要畧舉七事以破羣惑識者鑒之遠公禮太行山

宗卷四
道安法師出家妄傳師栴檀尊者一誑也妄以道安為遠公孫者二誑也遠公三十年影不出山足不入俗妄謂白莊劫擄者三誑也晉帝三召遠公稱疾不赴妄謂賣身與崔相公為奴者四誑也道安臂有肉釧妄謂遠公者五誑也臨終遺命露骸松下全身葬西嶺見在凝寂塔可證妄謂遠公乘彩舩升兜率者六誑也道生法師虎丘講經指石為誓石乃點頭妄謂遠公者七誑也悲夫世之姦佞不知祖師實德道聽途說妄裝點許多不遜之事播醜於後世取笑於四方謗瀆聖德識者見之不察其所由得不輕侮於

吾祖師耶豈非出佛身血五逆罪乎嘗觀宋元嘉中僧才觀惠嚴謝靈運翻涅槃經增損其辭目夢神人訶之曰敢以凡情輕瀆聖典觀等懼而止又惠琳以才學幸帝時號黑衣宰相自著白黑論毀佛教即感惡疾膚肉糜爛而死夫如是則妄造祖師傳記三途地獄可不懼乎凡吾同志詳審遠公實迹從本至末痛告諸方光揚祖道庶先聖之屈於斯雪矣

壁谷釋曇鸞大師

師鴈門人也少遊五臺感其靈異自誓出俗三乘頓漸具陶文理又嘗抱疾行至汾川俄見雲陰陟盡天

守卷四
十一
門洞開六欲階位上下重複鸞方瞬目疾乃隨愈鸞於是切用心佛道常如不及開蒙誘俗無間遠遁初鸞好為術學聞陶隱居得長生法涉遠就之陶以仙經十卷授鸞鸞躍然自得以為神仙之術其必然也後還洛下遇菩提留支意頗得之問支曰佛道有長生乎其能却老為不死乎支笑而對曰長生不死吾佛道也即以觀無量壽經授之曰汝可誦此則三界無復生六道無復往盈虛消息吉凶成敗無得而生其為壽也有劫石焉有河沙焉沙石之數有極壽量之數無期此吾金仙氏長生也鸞承其語驟起深信

遂焚所學仙經而專觀經焉每於觀經得其義理修三福業想像九品雖云寒暑之變疾病之來不懈于始念魏主憐其志尚又嘉其自行化他道業弘廣號為神鸞勅住并州大嚴寺未幾移住汾州玄中寺一夕鸞正持誦一梵僧軒昂而來入其室曰吾龍樹也所居淨土以汝有淨土之心故來見汝鸞曰何以教我樹曰已去不可及未來未可追現在今何在白駒難與回言訖而失鸞以所見勝異必知死生之期屆矣即集弟子數百人盛陳教誡言其四生役役其止無日地獄諸苦不可以不懼九品淨業不可以不修

因令弟子齊聲高唱阿彌陀佛驚乃西向瞑目頓顙
而示滅是時道俗同聞管絃絲竹之聲由西而來良
久乃寂

天台智者大師

師諱智顓字德安姓陳氏潁川人母徐氏夢香烟五
彩繞身有孕誕生之日神光煥室自有重瞳眉分八
彩孩幼見像即禮逢僧必拜十八歲投湘州果願寺
出家誦法華經兼通律藏性樂習禪遂往大蘇山禮
慧思禪師北面事焉思師一見乃曰昔日靈山同聽
法華宿緣所追今復來矣因授與法華三昧三七日

誦經至於藥王本事品是真精進是名真法供養至
此句時身心豁然寂而入定照了法華若曦和臨於
萬眾達諸法相如清風遊於太虛將證白師師曰非
汝不證非吾莫識汝所證者是法華三昧前方便得
旋陀羅尼汝於說法人中寂為第一後弘法鄴都屈
伏時匠晚入天台降魔進行化緣既息於新昌大石
像前示疾告滅弟子請問生方乃曰吾諸師友皆從
觀音而來迎我及夜侍人見有佛至倍大石像臨終
說諸法門令唱無量壽經及觀經題目乃顧大眾合
掌讚曰四十八願莊嚴淨土華池寶樹易往無人火

車相現一念改悔尚得往生况戒定熏修聖行道力
實不唐捐言訖稱三寶名奄然而滅後有僧求知生
處乃夢觀音金容數丈智者從後而語僧曰汝疑決
不再驗智者生西方矣

京師善導和尚

釋善導唐貞觀中周遊寰宇求訪道津見西河綽禪
師行方等懺及淨土九品道場講觀經道大喜曰此
真入佛之津要修餘行業迂僻難成唯此觀門速超
生死吾得之矣於是篤勤精苦若救頭然續至京師
擊鼓四部弟子無問貴賤俾屠沽輩亦激悟焉導每

入佛室合掌胡跪一心念佛非力竭不休乃至寒冷
亦須流汗此相狀表於至誠出即為人說淨土法化
諸道俗令發道心修淨土行無有暫時不為利益三
十餘年無別寢處不暫睡眠除洗浴外未嘗脫衣般
舟行道禮佛方等專為已任護戒持品纖毫不犯未
嘗舉目視女人絕意名利遠諸戲笑所行之處淨身
供養飲食衣服四事饒益皆不自享並將回施好食
送大廚供養徒眾唯食麁惡以自支身乳酪醍醐皆
不飲噉諸有襯施將寫阿彌陀經十萬餘卷所畫淨
土變相三百餘壁所至見壞伽藍及故磚塔寺皆悉

營造燃燈續明歲不絕三衣瓶鉢不使人持洗始終
無改化諸有緣每自獨行不共衆去恐與人行談論
世事妨修行業其有暫申禮謁聞說少法或得同預
道場親承教訓或曾不見聞披尋教義或展轉授淨
土法門者京華諸州僧尼士女至有投身高嶺或委
命深泉或自墮高枝焚身供養畧聞遠近百餘人諸
脩梵行棄捨妻子誦阿彌陀經十萬至三十萬徧者
念阿彌陀佛日得一萬五千至十萬徧者及得念佛
三昧往生淨土者不可知數或問導曰念佛之善生
淨土耶對曰如汝所念遂汝所願於是導乃自念阿

彌陀佛如是一聲則有一道光明從其口出十聲至
千百聲光亦如之導謂人曰此身可厭諸苦逼迫情
偽變易無暫休息乃登所居寺前柳樹西向願曰願
佛威神驟以接我觀音勢至亦來助我令我此心不
失正念不起驚怖不於彌陀法中火生退墮願畢於
其樹上端身立化時京師士大夫傾誠歸信咸收其
骨以葬高宗皇帝知其念佛口出光明又知捨報之
時精至如此賜寺額為光明焉天竺式戡主畧傳云
阿彌陀佛化身自至長安聞滙水聲和尚乃曰可教
念佛遂立五會教廣行勸化人有至信者見和尚念

佛佛從口出三年後滿長安城內皆受化念佛事見
別傳後有法照大師即善導後身也德宗時於并州
行五會教化人念佛帝於長安常聞東北方有念佛
聲遣使尋覓至大康果見照師勸人念佛遂迎入內
用劉球繩牀教宮人五會念佛事彰本傳矣

金臺法照大師

釋法照唐大曆二年棲于衡州雲峰寺慈忍戒定為
時所歸一旦於僧堂食鉢中覩五色雲雲中有寺寺
之東北有大山山有澗澗北有石門門去可五里復
有一寺金榜題曰大聖竹林寺照雖目覩而其心內

尚懷隕穫他日食時復於鉢中見五色雲雲現數寺
無有山林穢惡純金色界池臺樓觀衆寶間錯萬菩
薩衆而處其中中有諸佛嚴淨國土種種勝相照欣
所見因訪問之有嘉延曇暉二僧曰聖神變化不可
以凡情測若論山川面勢乃五臺爾四年夏照於衡
州湖東寺啓五會念佛道場其年六月二日五色祥
雲彌覆其寺雲中亦有樓閣閣上有數梵僧身可丈
餘執錫行道又見阿彌陀佛與二菩薩其身高大等
虛空界日既暮矣照於道場之外遇老人曰汝先發
願於金色界禮覲大聖今何輒止照曰時艱路難不

止如何老人曰但能亟去則去之何其艱也照未暇對老人失焉照以所見勝異重讚願曰願以此身奉覲大聖雖復火聚冰河終無退惰其年八月十三日與同志數人由南嶽前去果無艱險五年四月五日至五臺縣遙見寺南有數道光六日達佛光寺一如鉢中所見畧無差脫是夜四更復有異光北來射照照不知所裁乃問曰此何祥也吉凶焉在僧云此大聖不思議光攝汝身心何乃問也照聞之卽具威儀前詣一寺寺之東北可五里果有山山有澗澗北有石門門傍有二童子一補善財一補難陀引照入門此

行幾五里見一金門門上有樓其樓之側復有一寺寺門有大金榜題曰大聖竹林寺寺之方圓可二十里一百餘院院院皆有寶塔黃金爲地華臺玉樹充滿其中照入寺之講堂見文殊在西普賢在東皆踞師子高座照於二菩薩前作禮問曰末代凡夫智識淺劣佛性心地無由顯現未審脩行於何法門最爲其要惟願大聖斷我疑網文殊曰汝所請問今正是時諸脩行門無如念佛俄於過去劫中因念佛故得於一切種智是故一切諸法般若波羅蜜多甚深禪定乃至諸佛正徧知海皆從念佛而生照曰當云何

念文殊曰此世界西有阿彌陀佛彼佛願力不可思議汝當繼念令無間斷命從之後決定往生說是語時二大菩薩舒金色臂以摩照頂與授記曰汝以念佛不思議故畢竟證無上覺若善男女願疾出離應當念佛時二菩薩互說伽陀照得聞已益加踊躍文殊又曰汝可往詣諸菩薩院巡禮以承教授照如其言歷請教授次至七寶華園從其園出於大聖前作禮辭退且見向者善財難陀二童子送至門外照復作禮舉頭俱失至十三日照與五十餘僧往金剛窟無着見大聖處忽見其地廣博嚴淨琉璃衆寶以成

宮殿文殊普賢可萬菩薩佛佗波利亦在其中照得見已隨衆皈寺其夜三更於華嚴院之西樓又見寺東巖壑之畔有五枝燈大方尺餘照曰願分百燈以皈一面燈分如願重願分為千炬炬亦如之行行相當光光相涉光中殊異徧於山野照又前詣金剛窟願見大聖殆其三更見一梵僧自稱佛陀波利引之入寺至十二月朔日於華嚴院入念佛道場中載念文殊普賢二菩薩謂我畢竟證無上覺又復記我念阿彌陀佛決定往生於是一心念佛正念佛時倏見前來梵僧入道場云汝之淨土華臺現矣後三年花

開汝當往矣然汝所見竹林諸寺何為不使羣生共
知照聞之憶念昔時所見因得命匠刻石無於所見
竹林寺處特建一寺號竹林焉寺之云畢照曰吾事
畢矣吾豈久滯於此不累日而卒焉

睦州少康法師

師縉雲仙都人母羅氏遊鼎湖峰得玉女捧青蓮華
授之且曰此華吉祥授之於汝當生貴子及生康曰
青光滿室香似芙蓉年十有五誦法華楞嚴等經五
部尋往越學究毘尼及聽華嚴瑜伽諸論貞元初至
洛下白馬寺見殿內文字累放光明康不能測即探

而取之乃善導昔為西方化導文也康曰若於淨土
有緣當使此文光明再發此願未已果重閃爍康曰
劫石可移而我之願無易也遂之長安善導影堂大
陳薦獻倏見善導現於空中謂康曰汝依吾教利樂
有情則汝之功當生安養康聞如有所證南適江陵
果願寺路逢一僧曰汝欲化人念佛當往新定言訖
而隱泊到睦州人未從化康乃乞錢誘引小兒曰能
念阿彌陀佛一聲與汝一錢小兒務得其錢念佛者
衆師曰念佛十聲乃與一錢如是一年大少貴賤凡
見康者則曰阿彌陀佛於是念佛之人盈溢道路貞元

十年康於烏龍山建淨土道場等埧三級聚人午夜
行道入道場時康自陞座令男女弟子面西高聲念
阿彌陀佛衆見師念佛一聲佛從口出連念十聲若
聯珠狀康曰汝等見佛不如見佛者決生淨土其禮
佛人亦有不見佛者貞元二十一年十月三日囑累
道俗當於安養起增進心於閻浮提生厭離想此時
見佛真我弟子言訖放異光數道奄然而逝塔於臺
子巖天台德韶禪師重新之後之人多指其塔為菩
導焉

省常大師

師諱省常字造微顏氏子錢塘人十七歲出家受具
戒行謹嚴通大乘起信習天台止觀法門續廬山遠
公遺風宋淳化中住杭州西湖昭慶寺專脩淨業結
淨行社相國向公王文正公旦爲社首士大夫預會
皆投詩頌自稱淨行弟子師乃自刺指血和墨書華
嚴經淨行品每書一字三拜三圍繞三稱佛名刊板
印成千卷分施千人又以梅檀香雕造毗盧遮那佛
像成而跪地合掌發誓願云我與一千大衆八十比
丘始從今日發菩提心窮未來際行菩薩行願盡此
報身以生安養國翰林承旨宋白撰碑翰林學士蘇

易簡作淨行品序壯元孫何題社客於碑陰孤山圓
法師作師行業記中引蘇公序曰予當布髮以承其
足剗身以請其法猶無嗔恨况陋文賤學而有恪惜
哉宋公碑曰師慕遠公啓廬山之淨社易蓮花為淨
行之名遠公當衰季之時所結者半隱淪之士上人
屬承平之世所交者多有德之賢方前則名士且多
垂裕則津梁曷已因二公之言想當時之盛亦可槩
見矣天禧四年正月十二日示寂壽六十二

長蘆慈覺禪師

師諱宗贖號慈覺襄陽人也父早亡母陳氏鞠養於

舅氏少習儒業志節高邁學問宏博二十九歲禮真
州長蘆秀禪師出家叅通玄理明悟如來正法眼藏
元祐中住長蘆寺迎母於方丈東室勸母剪髮甘旨
之外勉進持念阿彌陀佛日以勤志始終七載母臨
終際果念佛無疾吉祥而逝師自謂報親之心盡矣
乃製勸孝文列一百二十位撰葦江集坐禪箴仍遵
廬山之規建蓮花勝會普勸僧俗同脩念佛導以觀
想其次立法預會日念阿彌陀佛自百聲至千聲千
聲至萬聲回向發願期生淨土各於目下以十字計
之以辨功課師一夕夢一人烏巾白衣風貌清美可

宗卷四
三十許揖謂師曰欲入蓮花會告書一名師乃取會
錄問曰何姓名荅曰普慧書已白衣又云家兄亦告
上一名師曰令兄何名荅曰普賢言訖遂隱師覺已
謂諸老宿曰華嚴經離世間品有普賢普慧二菩薩
助揚佛法吾今建會共期西方感二大士幽贊乃以
二大士為會首云於是遠近皆嚮化焉

永明壽禪師

師名延壽字冲玄號抱一子丹陽人父王氏生而早
異父母有諍即從高榻奮身于地二親息諍長為儒
十六歲獻吳越王齊天賦衆推間世之才欲出家父

母不聽遂刺心血濡毫斷葷終期副心三十四歲依
龍舟寺永明大師落髮受具朝供衆夜習禪因覽知
度論云佛世一老人求出家舍利弗不許佛觀此人
曩劫採樵為虎吓逼上樹失聲念南無佛有此微善
遇佛得度獲羅漢果師念世間業繫衆生不能解脫
惟念佛可以誘化乃印彌陀塔四十萬本勸人禮念
一日懺堂遶旋次忽普賢像前蓮華在手因思宿願
進退未決遂作二紙闡一曰一心禪定一曰萬善生
淨土中夜冥心自期曰於此二途功行成者須七度
拈起並得萬善生淨土闡一無間隔於是每日誦經

禮佛念佛說戒施食放生日行利益事一百八件未嘗暫怠越王初淨慈寺命住持賜智覺禪師號會三宗師德製宗鏡錄一百卷萬善同歸集神棲安養賦等九十七卷並行于世師志誠殷重專以念佛勸人同生淨土世稱宗門之標準淨業之白眉臨終預知時至殊勝甚多茶毘舍利麟砌于身嘗有僧死入冥見閻王殿左供養畫僧一幀禮拜勤致云是永明壽禪師此人生西方上品故禮敬之

天竺慈雲懺主

師諱遵式字知白姓葉台州臨海縣人也號慈雲懺

主其母乞靈於古觀音遂生法師初往東掖山師義全十八祝髮先於禪林寺習律繼入國清普賢像前燃指誓習台教學高行苦名冠二浙博習教觀專志安養嘗要期般舟三昧九十日素苦學嘔血處道場兩足皮裂師以死自誓忽一日恍若夢寐見白衣觀音垂手指口中引出數虫又指間出甘露注其口身心清涼自此宿疾頓愈出懺頂相高寸餘雙手下垂過膝聲如鳴鍾皆與舊異衆皆歎仰之師建下天竺寺數百間三經賊難每藝而火自滅乃願力堅固所致師當化之日山中人見大星殞于靈鷲峰度弟子

百卷四
百人學徒千數臨終即炷香瞻像而祝之曰十方諸佛同住實際願住此實際受我一炷之香諸佛證明往生安養或問其所歸者以淨土寂光對之至其夕坐終當天聖年間也壽六十九臘五十著往生淨土決疑行願二門及淨土懺法金光明觀音諸本懺儀行於世天台風教益盛于吳越者實資夫天竺慈雲之德也觀決疑行願二門經曰十方諦求更無餘乘唯一佛乘斯之謂歟懺主悟本性之常寂光履唯心之佛土淨自利利他事理無碍著述數百篇每談言皆以淨土為歸向之宗大闡諸經教理普化一切自

懺文傳流于世往生淨土者不知其幾千萬人繼天台之道贊淨土之化世未有也

文潞公傳

公姓文諱彥博守洛陽嘗致齋往龍安寺瞻禮聖像忽見像壞墮地畧不加敬但瞻眎而出傍有僧曰何不作禮公曰像既壞吾將何禮僧曰先德道譬如官路土人掘以為像智者知路土凡人謂像生後時官欲行還將像填路像本不生滅路亦無新故公聞之有省由是慕道甚力專念阿彌陀佛期生淨土晨香夜坐未嘗少廢每談願曰願我常精進勤修一劫善

願我了心宗廣度諸含識每見一切人則勸以念佛
誓結十萬人緣同生淨土如居士有頌贊曰知公
膽氣大如天願結西方十萬緣不為一身求活計大
家齊上渡頭船

潞府宗坦疏主

師俗姓申氏本貫潞州黎城人也自幼年於本州延
祥院出家禮僧道恭為師年十六落髮受具少通義
學為時所稱長而徧訪名師廣弘知見自甬講林德
譽垂五十年以大藏為遊息以圓頓作門庭先講圓
覺等經後集圓覺十六觀經等疏老年多於唐鄧汝

穎之間講淨土觀經無勸人念佛求生安養是時聽
者如雲皆稟淨業後於唐州青臺鎮誓求安養念佛
觀想以為常住三業四儀未嘗暫忘大宋政和四年
四月二十七日忽於夢中見彌陀化佛告曰汝說法
只有六日在後當生淨土也師覺白衆曰吾脩求安
養似得因緣相應適來化佛告我得生淨土敢不信
乎次日雖覺不豫講唱不輟於當年五月初四日丑
時自知時至乃鳴鍾集衆告曰因緣聚散固當有時
淨土勝緣唯憑時刻幸望大眾念佛助徃又告曰享
年七十六四大分離處淨土禮彌陀永超三界苦言

訖坐滅滿空雷鳴白雲覆地從西而來三日方歇師
先有瑪瑙念珠一串臨終盤於指上衆人竟不能取
感應事繁如別處說

慈照宗主

師諱子元號萬事休平江崑山茅氏子母卞氏夜夢
佛一尊入門次旦遂生因名佛來父母早亡投本州
延祥寺志通出家習誦法華經十九歲落髮習止觀
禪法一日正定中聞鴉聲悟道乃有頌曰二十餘年
紙上尋尋來尋去轉沉吟忽然聽得慈鴉叫始信從
前錯用心於是利他心切發廣度願乃慕廬山遠公

蓮社遺風勸人皈依三寶受持五戒一不殺二不盜
三不媼四不妄五不酒念阿彌陀佛五聲以證五戒
普結淨緣欲令世人淨五根得五力出五濁也乃撮
集大藏要言編成蓮宗晨朝懺儀代為法界衆生禮
佛懺悔祈生安養後往澱山湖初立蓮宗懺堂同脩
淨業述圓融四土三觀逆佛圖開示蓮宗眼目四十
六歲障臨江州逆順境中未嘗動念隨方勸化即成
頌文目曰西行集乾道二年壽聖高宗詔至德壽殿
演說淨土法門特賜勸脩淨業蓮宗導師慈照宗主
就錢塘西湖昭慶寺祝聖謝恩佛事畢回平江嘗發

誓言願大地人普覺妙道每以四字為定名之宗示導
教人專念彌陀同生淨土從此宗風大振師集彌陀
節要法華百心證道訶風月集行于世三月二十三
日於鐸城倪普建宅告諸徒曰吾化緣已畢時當行
矣言訖合掌辭衆奄然示寂二十七日荼毘舍利無
數塔于松江力及市五港吾覺昌宅勅謚最勝之塔

宋朝無為子楊提刑

公諱傑字次公無為郡人道號無為子雄才俊邁年
少登科官至尚書主客郎提點兩浙刑獄事而又尊
崇佛法明悟禪宗江西臨濟下棒喝之輩猶謂常流

復闡揚彌陀教觀接誘方來括其所談乃謂衆生根
有利鈍其近而易知簡而易行者唯西方淨土也但
能一心觀念總攝散心仗彌陀願力直超安養更無
他趣決取成功矣龍樹所謂易行之道依他力故也
公作天台十疑論序王古直指淨土決疑集序法寶
僧監彌陀寶閣記安樂國三十讚備陳西方要津誠
為萬世往生龜鑑矣公有輔道集專記佛乘東坡作
序其畧曰無為子宿稟靈機徧叅知識凡所謂具爍
迦羅眼者次公目擊而道存焉公晚年作監司郡守
乃畫丈六彌陀尊像隨行觀念至壽終時感佛來迎

端坐而化辭世頌曰生亦無可戀死亦無可捨太虛
空中之乎者也將錯就錯西方極樂宣和中有荆王
夫人神遊淨土見公坐蓮花上則徃生必矣然則本
朝士大夫洪贊淨方入正定聚者唯公洎王敏仲侍
郎二人而已豈非天欲久其道世必生其人者歟

龍舒居士王虛中

國學進士王日休字虛中君自行之智化他之悲已
見張子湖序文茲不再述公龍舒人有淨土文因以
爲號其文盛行天下修淨業者莫不覽之乾道中廬
陵李彥弼染時疾垂革棺槨已備忽夢一人神清貌

古以手按摩肢體弼驚問荅曰予龍舒居士也弼因
以疾告公曰汝起食白粥卽差矣又曰汝還記闕仲
雅教汝捷徑不弼曰每日念佛不輟弼覺因索白粥
食之病果愈後見公畫像儼如夢睹弼敬重公稱生
死骨肉遂見子侄遠從其學一日忽迴曰居士於某
夜講書罷如常禮念至三鼓忽厲聲稱阿彌陀佛數
聲唱言佛来接我屹然立化邦人此夜有夢二青衣
引公西行者又三日前徧別道友勉脩淨業有不復
相見之語噫自非了唯心本性之道達生死變化之
數不臻于是或疑李之夢因想以成弼曰其指白粥

宗卷四
二五八
愈病又安可欺哉時丞相益國公周必大睹君奇跡製為之贊曰皇皇然而無求惕惕然而無憂閔頽風之將墜攬衆善以同流導之以仁義之源誘之以寂滅之樂世知有作而莫識其無為故中道奄然而示人以真覺李君謹忽無以報德遂刊公像并事跡以傳遠自是廬陵家家供事之

儀真王侍郎

王侍郎諱古字敏仲東都人也曾任尚書禮部侍郎因作發運使遂居儀真稟性至仁寬慈愛物大弘佛教開闡化原曩遇京師乃尊宿叢林之淵藪嘗與之

論道及遊江西黃龍翠巖與晦堂楊岐輩同為禪侶深契宗旨又悟彌陀淨土法門之勝博考諸經深究往生觀穿經文發明佛意乃作直指淨土決疑集三卷楊次公提刑作舒載之本傳侍郎纂集大彌陀經四十八願十六觀經九品往生馬鳴菩薩大乘起信論忠國師對肅宗隨意往生念佛三昧寶王論及諸經論備陳往生淨土要門該羅具錄如補念南無三十六萬億一十一萬九千五百同名同號阿彌陀佛亦於藏經中節出至於諸菩薩論淨土法門之要皆悉編集侍郎平日脩行觀念之心未嘗間歇數珠持

念常不去手行住坐卧悉以西方淨觀為佛事有僧
神遊淨土見侍郎與葛繁大夫同在淨土而作佛事
乃往生安養之證驗也弘通淨土開示要津助阿彌
陀普化一切自廬山十八賢之後繼此道以助佛揚
化者獨次公敏仲著名於當時流傳數百世之下弘
通彌陀大教廣度攝化之盛無有窮盡則晋代朝士
之高致唯二公獨得之乃能光顯前賢克緬其遺風
也

已上諸祖得道宗師並係大藏高僧傳往生傳寶
珠集中錄出如慈照宗主道化盛行于世王臣僧

鏡湖堂跋

俗悉皆崇向念佛得道者甚衆及觀諸傳錄中都
不備載無文可考今搜訪慈照宗主事蹟已入集
其餘應有一切在家出家念佛得道名行之士專
俟高賢用心尋究實錄廣為發揚即當補入刊行
庶免埋沒前修之德抑亦法門之光幸也

廬山蓮宗寶鑑念佛正派卷第四終

廬山蓮宗寶鑑念佛正信卷第五 第六章

念佛正信說

夫唯心樂國普徧十方自性彌陀圓融一智妙應於
 色聲之境流光於心目之間就中反妄歸真直下背
 塵合覺昔我法藏發弘誓啟極樂之玄途故佛世尊
 拈西方示韋提之妙域是乃廣長舌覆而同贊諸餘
 經盡而獨留蓋以利生之喜捨心增應化之慈悲量
 大教分九品乃別開方便之門觀明一心實徑直還
 源之路聖凡際會如久客歸於家鄉感應道交似稚
 子投於慈母昧斯至理觸類皆迷信此圓談事無不

達况復慈光願攝佛力難思順水乘船不勞自力推
門落曰豈有他哉有願必迎無機不被舟石可濟獄
火頓消菩薩聲聞生彼者無量無數前賢後聖得道
者可檢可尋鸚鵡頻伽尚有法音演唱蛸飛蜺動悉
蒙教化恩慈聖境非虛佛言不妄何乃愛河浪底沉
溺而不憂火宅焰中焚燒而不懼密織癡網淺智之
刃莫能揮深種疑根汎信之力焉能拔遂即甘心伏
意幸禍樂灾却誹清淨之邦貪戀煩惱之世焦蛾爛
蠶自處餘殃籠鳥鼎魚翻補快樂皆由善力微而業
力勝信根少而罪根多是以三界茫茫四生擾擾盡

貪生而兀兀孰解知歸悉逐業以悠悠不求出要過
去生死劫石難窮未來輪迴芥城何盡匪夙生之有
幸豈得遇於斯曰擊鼓開囹圄之門宜應速出逢舟
濟沉淪之難詎可遲疑敬順金文善隨佛學不聞不
解者可痛可傷焉矧茲五濁惡世四面火焚惟佛一
人力能救援既聞妙法宜植淨緣一念信誠萬德因
種思齊先哲希悟真常普皆如說奉行盡心頂禮信
受

斷疑生信

經云得為人難六根完具難生中國難值佛道難與

宗卷五
信心難蓋嘗論信之難興者緣有其疑也不斷其疑何由生信故金剛經云正信希有法華經云以信得入王龍舒云佛為大醫王能救一切病不能救命盡者佛能度一切人不能度不信者蓋信者一念之真誠也若人心念要去身則隨去心念欲住身則隨住是知此身隨心念動有念欲去而身被牽繫者色身壞時惟一念而已一念到處則無處不到所以一念信心念佛求生淨土則必到淨土况吾佛世尊諸大菩薩又有本誓願力接引往生乎或問之曰今有一生持戒念佛臨終不得生淨土者何也答曰此蓋信

力不深行願之有虧也兼不曾發菩提之大心又不曾斷十惡之邪行雖曰修行未嘗言行相應雖曰念佛未嘗淨念相續既無真實之功焉得淨土之報也淨名經云隨其心淨則佛土淨六祖壇經云心中若無不善西方去此不遙若懷不善之心念佛求生難到不斷十惡之心何佛而來迎請大師故見世人不務淨心只是口念佛名於其心外求佛妄想執著而不自淨其心心造諸惡是謂自喪其佛又何更別求佛哉所以道迷即衆生悟即佛也圓通法門云憶佛念佛現前當來必定見佛蓋憶念者是心念也信心

清淨信行願俱備也楞嚴云一根既返源六根成解脫十惡化為十善六識化六神通所以正信心中憶念佛名淨念相續自性彌陀現前此感彼應臨命終時安得不見佛而生淨土乎凡修淨業者當信佛之言而行佛之行心口既不相違因果決然不昧耳若也聞而不信信而不行由畫餅之不充飢也心既無信則生疑謗既興疑謗則自昧其心自昧其心則淨土遠之遠矣故香山周居士述慈照蓮宗懺序云道師者化物有方誨人存理以深信為能入破諸聞提專念佛為行門令心不亂加菩提願心為根本度脫

衆生備此三者乃極樂淨土上品之可登毘盧果海流流而易到也又云此事人人本具箇箇圓成無信行願三字因茲淪墜嗚呼凡為人者不在福德不在尊貴不在聰明不在相貌但具信行願者乃生淨土之資糧也四料揀云從是西方過十萬億佛土有世界名曰極樂是約遠也若一念信心念佛即到西方是約近也故云亦近而亦遠在人之信願信不隔絲毫疑而生死轉又云從是西方過迢迢十萬程資糧若具足何愁去不成是也所以道信為萬善之首信為百行之宗華嚴以十信為成佛之始法華以正

信為入道之門五根以信根為先五力以信力為最
是故三世諸佛諸大菩薩歷代祖師修諸功行具大
願力入佛境界成就菩提未有不從這箇信字而入
也鸞法師遇留支觀經即焚仙經而修淨業豈不是
這信字也白侍郎行也彌陀坐也彌陀不出這信字
也蘇學士佩帶彌陀畫像行坐隨身言是西方公據
者蓋亦不出這信字也張善和一生殺牛臨終自見
地獄相現遇僧教令念阿彌陀佛念未十聲見佛接
引往生淨土即脫地獄豈不是信得及而致然耶華
嚴經云信為道元功德母信能長養諸善根信能超

出眾魔路信能得入三摩地信能解脫生死海信能
成就佛菩提嗟乎今時齋人信持戒而不信念佛信
奉佛而不信往生淨土是皆自失其大利也諒哉人
天路上以福為先生死海中念佛第一今有欲快樂
人天而不脩福欲出離生死而不念佛是猶鳥無翼
而欲飛木無根而欲茂奚可得哉凡我同盟切須深
信諸佛所說真實非虛脫苦良方無如念佛專修淨
業期出輪迴時不待人慎勿疑悔可謂此身不向今
生度更向何生度此身

勸發信心

夫阿彌陀佛者諸佛中尊四生之父歸信者滅罪河沙稱念者得福無量凡欲念佛要起信心若無信心空無所獲是故肇法師云是事如是者信之相也是事不如是者不信之相也夫信為入道之初宗智為究竟之玄術諸經首稱如是者信也後曰奉行者智也故彌陀經云若有信者應當發願生彼國土此是釋迦本師勸信處又云汝等當信是稱讚不可思議功德此是六方諸佛勸信處又云若人種善根疑則花不開信心清淨者花開即見佛此是往生論勸信處又云信者順之詞信則所言之理順順則師資之

此五品註

道成經無豐約非信不傳此是肇法師勸信處又云念佛法門不問道俗不論男女不拘貴賤修此法者唯要信心此是大行和尚勸信處問曰既言信者未知信何法門答曰信意者信憑經中佛說念佛定生淨土信念佛定滅諸罪信念佛定得佛護信念佛定得佛證信念佛臨終定得佛來迎接信念佛不問衆生同信之人皆得往生信念佛往生定得不退地信念佛生淨土定不墮三惡道所以勸信念佛受此法持此念則往生淨土必矣故大行和尚遣念佛人心唯信佛佛則知之他心通故口惟稱佛佛則聞之天

耳通故身唯禮佛佛則見之天眼通故是以大行和
尚以此念佛法勸人生信心也又喻云信心者猶如
深栽果樹根深故風吹不動後著果實濟人飢渴念
佛之人亦復如是。要由深信得到西方若無信心空
無所獲是故經言十住菩薩一起信心念佛之後縱
遇惡緣寧捨身命不退信故維摩云深信堅固猶如
金剛法珍普照如雨甘露念佛三昧後深信生君者
淨土恆沙佛盡是當年正信人

天竺慈雲式懺主往生正信偈

稽首西方安樂刹 彌陀世主大慈尊

我依種種修多羅	成就往生決定信
住大乘者清淨心	十念念彼無量壽
臨終夢佛定往生	大寶積經如是說
五逆地獄衆火現	值善知識發猛心
十念稱佛即往生	十六觀經如是說
若有歡喜愛樂心	下至十念即往生
若不爾者不成佛	四十八願如是說
諸有聞名生至心	一念回向即往生
唯除五逆謗正法	無量壽經如是說
臨終不能觀及念	但作生意知有佛

此人氣絕即往生	大法鼓經如是說
一日一夜懸繒蓋	專念往生心不斷
卧中夢佛即往生	無量壽經如是說
晝夜一日稱佛名	懃懃精進不斷絕
展轉相勸同往生	大悲經中如是說
一日二日至七日	執持名號心不亂
佛現其前即往生	阿彌陀經如是說
若人聞彼阿彌陀	一日二日若過等
繫念現前即往生	般舟經中如是說
一日一夜六時中	五身禮佛念不斷

現見彼佛即往生	鼓音王經如是說
十日十夜持齋戒	懸繒幡蓋然香燈
繫念不斷得往生	大彌陀經如是說
若人專念一方佛	或行或坐七七
現身見佛即往生	大集經中如是說
若人自誓常經行	九十日中不坐卧
三昧中見阿彌陀	佛立經中如是說
若人端坐正西向	九十日中常念佛
能成三昧生佛前	文殊般若如是說
我於衆經頌少分	如是說者無窮盡

願同聞者生正信 佛語真實不欺誑
佛既顯言易往生 幸各正信無疑惑

天台智者大師淨土十疑論序

夫四果之明不能測如來之奧十地之聖不能窮極
果之妙矧茲凡夫生無慧目陷三界有必固之妄指
淨土謬難轉之疑疑之於身知五蘊之未滅疑之於
心知萬惑之未遣疑之於行知六度之未濟由漂沈
未濟之行期濟於已濟之域在於其已猶惑之况他
人哉此物情難信為道俗所共疑也隋智者大師心
與物冥智將神會乘時翼教異迹由著因其所異考

其所證不知其三賢之人乎十聖之人乎其為應正
等覺妙神化于難思乎蓋亦思之不能知也但大師
念定總持昭晰行業期生淨土間無容髮誤大師之
所有存者其十疑之文乎然其文遠取諸經近取諸
論去就其意以取諸傳無離經以備事無飾辭以增
巧審辭達意能極九品之所生乃見大師之用心也
見大師之心者其於淨土之有疑所謂高天無雲群
星刊彩經紀之所相殊躔次之所相異燦燦然無一
而隱者也予得其聞載念能仁所稱淨土者累焉諸
佛證而成之者或舌相以覆大千或潮音而演梵說

宗卷五
九
余雖陋學不得以相輝映烏可無言哉故於論首略
陳一二以罄余所懷雖辭膚理淺不足起大師之化
在其先佛證成之義且有皈矣

無為楊提刑直指淨土決疑序

大願聖人從淨土來來實無來深信凡夫往淨土去
去實無去彼不來此此不往彼而其聖凡會遇兩得
交際者何也彌陀光明如大圓月徧照十方水澄而
清則月現全躰月非趣水而遽來水動而濁則月無
定光月非捨水而遽去在水則有清濁動靜在月則
無取捨去來故華嚴解脫長者云知一切佛猶如影

像自心如水彼諸如來不來至此我亦不往彼我若
欲見安樂世界阿彌陀佛隨意即見是知衆生注念
定見阿彌陀佛此乃禰性實言非權教也淨土無欲
非欲界也其國地居非色界也生有形相非無色界
也一切衆生未悟正覺處大夢中六道升沉未嘗休
止諸天雖樂報盡相衰脩羅方噴戰爭互勝旁生飛
走噉食相殘鬼神幽陰飢渴困逼地獄長夜痛楚號
呼得生人趣固已為幸然而生老病死衆苦縈纏惟
是淨邦更無諸苦蓮苞託質無生苦也寒暑不遷無
老苦也身無分段無病苦也壽命無量無死苦也無

父母妻子無愛別離苦也上善人聚無怨憎會苦也
花械香食珍寶受用無求不得苦也觀照空寂無蘊
苦也悲濟有情欲生則生不住寂滅非二乘也智照
生死得不退轉非凡夫也三界蕩然譬如四裔丘陵
坑坎腐穢所積溪壑阻絕孰為津梁迺有狂人迷路
于此惡獸魑魅惱害雜居刀兵水火或時傷暴風霜
霹靂凌厲摧悞罔知城域可以庇覆飲食衣服未或
充足甘受是苦不求安樂有佛釋迦是大導師指清
淨土是安樂國無量壽佛是淨土師爾諸衆生苦生
彼土則無諸惱不聞知者固可哀憐亦有善士發三

種心不求生者尤可嗟惜一曰吾當超佛越祖淨土
不足生也二曰處處皆淨土西方不必生也三曰極
樂聖域我輩凡夫不能生也夫行海無量普賢願見
彌陀佛國雖空維摩常脩淨土十方如來有廣舌之
讚十方菩薩有同往之心試自忖量孰與諸聖謂不
足生者何其自欺哉至如龍猛祖師也楞伽經有預
記之文天親教宗也無量論有求生之偈慈恩通讚
首稱十勝智者析理明辯十疑彼皆上哲精進往生
謂不必生者何其自慢哉火車可滅舟石不沈現華
報者莫甚於張馗十念而超勝處入地獄者莫速於

唯後再甦而證妙因世人憇尤未必若此謂不能生者何其自棄哉般舟三昧經云跋陀和菩薩問佛未來衆生云何得見十方諸佛佛教令念阿彌陀佛即見十方諸佛寶積經云他方衆生聞無量壽如來名迺至能發一念淨信歡喜愛樂所有善根回向願生彼國者隨願皆生得不退轉此皆佛言也不信佛言何言可信不生淨土何土可生自欺自慢自棄已靈流入輪迴是誰之咎四十八願悉為度生一十六觀同歸繫念一念既信已投種於寶池衆善相資定化生於金地母輒悔情誤認疑城即時蓮開得解脫道

唯心淨土自性彌陀大光明中決無魔事決疑集者王敏仲侍郎之編也開釋疑情徑超信地其載要旨最為詳審蓋安養國之鄉導也若登彼岸舟固可忘來者問津斯言毋忽

廬山蓮宗寶鑑念佛正信卷第五終

